


川仲  
 鴻齋  
 訓點  
 編輯  
 下

柳田文庫  
 文庫11  
 D 181  
 2





文庫 11  
D 181  
2

蘇軾  
詩話

蘇軾  
詩話

蘅華館詩錄卷三

長洲 王 韜 仲弢

為歐陽子庸題墨牡丹即步原韻

富貴何須更炫粧。一空色相自芬芳。未除黑業歸香界。且著緇衣懺法王。點筆東風辭絢爛。卷簾殘月照昏黃。迷離艷影渾難辨。燭暗幃深夜已央。

題後復得二絕句

圖成潑墨妙丰姿。翻遣風流出墨池。俗眼於今尚皮相。及春何不買胭脂。  
老去元妻空色相。窮來墨客少文章。天心亦自歸平淡。香國重封號素王。

贈歐陽子庸即送其從軍江甯兼和原韻

蘅華館詩錄 卷三

弢園叢書

柳田泉文庫

010190558040



海內烽烟滿。栖靡所安。但期成壯志。豈是戀微官。作客羞垂橐。逢場促上竿。聊將知己淚。遙向秣陵彈。

養親兼報國。素志已無羞。肯向風塵老。詎爲升斗謀。枕戈殘月落。擊楫暮潮愁。殺賊平生事。功名笑馬牛。

贈李壬叔即送其之吳門

西來絕學當今稀。疇人法在誰能知。海內作者三人耳。徐戴而外君當之。君於歷算由天授。時有妙悟參乎微。闡幽啟秘早歲出。君著有方圓圖函弧矢啟秘聲譽久已儒林馳。不希時尚甘寂寞。貌古學樸能深思。地球繞日月環地。胥循軌道相推移。古今源流聞屢變。動靜異說焚如絲。惟君精心具特見。縱橫辨論人稱奇。唐虞授時初講歷。周髀古術姬公垂。何年流傳入荒域。官學乃至在四夷。中法至久亦漸密。譬若積

薪弟踰師。况從利氏入中國。兼收並採多取資。近日臺官用西士。長調玉燭稱咸熙。惜君姓名未上達。當途拂拭今非遲。茗南宿學世推重。三吳開府盛文詞。擬設專科尙天算。挽回士習君所期。羨君此行酬夙志。明廷大用有其機。臨歧珍重贈君語。欲別未別空欷歔。

尹大將回嘉善與一平話女子同舟作此調之

尹郎此去是仙鄉。特祝東風趁野航。艷福幾生修得到。片雲吹下杜蘭香。姓女子杜

贈何梅屋布衣

何郎才調古無敵。贈我新詩鮑謝匹。緜以錦繩發光恠。挑燈一讀一擊節。讀罷拔劍斫地歌。當今滿地兵氛多。因鸞困鶴不得意。相逢海上悲如何。吁嗟厄運遘陽九。坎軻流離無不



有。才人失職倍傷心。故土成煙黯回首。少時意氣輕風塵。胸  
中所有非詩人。今已無家嗟泛宅。約將傾橐買比鄰。贈詩中  
有願領  
十萬買比鄰之句。東南一隅此樂土。挽輸千萬誠何補。誰說文臣不  
愛錢。到底將軍宜好武。平生踪跡溷屠沽。猶存吾舌真非夫。  
幾回投筆思殺賊。母老敢許以馳驅。書生獻策既不用。庸奴  
富貴何足重。誤。國誰完墮地甌。林時莫任擎天棟。托身莽  
莽此乾坤。把袂樓頭與細論。休誇行篋詩千首。且盡當筵酒  
一尊。

杭垣失守旋聞收復誌感

金碧樓臺一炬空。者回劫火太匆匆。蒼黃守禦無長策。僥倖  
驅除計戰功。豈繫偏師能制勝。獨拚孤注見英雄。西湖久有  
誅茅想。追念前游感慨中。余於戊午  
九月至杭

贈湘鄉二左

湘鄉二左名父子。胸羅萬卷富文史。阿兄經濟稱妙才。坐令  
一家兩國士。方今海內苦烽烟。四郡良家同轉徙。避吳逃越  
無甯居。一角羈縻暫至此。此才奚許俗眼知。眉間颯爽生雄  
姿。腰懸寶劍自言利。不識天下健者誰。長揖見我獨傾倒。憂  
時謂我同懷抱。願酬知己報國恩。從戎手把機槍掃。身世  
艱難獨愴然。江湖安得容高眠。時亂民情益險惡。不如歸隱  
湘江邊。春申浦上日見面。文采風流軼羣彥。煮酒談兵氣自  
豪。忠孝心肝終不變。湘鄉二左三楚雄。吳門亂後初相逢。願  
從君去隱湘水。上下追逐如雲龍。

年來諸友中多凋喪者詩以志勸

歎逝嗟卑意興窮。光陰黯淡酒杯中。論交朋輩凋零盡。報



國文章涕淚空。別浦荒荒流水綠。墓門寂寂野棠紅。幾回欲  
作唐衢哭。宿草淒然暗夕風。

滬濱雜感

括貨餉士財無繼。築塹圍城賊未擒。天貸元凶成白首。地難  
盡鑿出黃金。連營師老生驕志。曠野聲多變徵音。眼看東南  
全局壞。獨搔短髻發哀吟。  
一春三月逢晴少。十萬連師決戰難。兵氣不揚沈苦雨。殺機  
先兆作嚴寒。已知乾象關時局。且望人才策治安。今日須籌  
攻守計。隄防首在障奔瀾。  
窮寇何知連趙魏。潛踪竟爾出陰平。但求緩死拚孤注。不謂  
同時潰列城。環壁援軍曾幾戰。守陴鄰卒日三驚。本來吳越  
爲唇齒。賊退齊聞慶再生。

連疆吳越爲憂大。半壁東南一擲休。四郡蒼生同陷賊。百年  
殺運始逢秋。賀循身幸離江表。陶侃軍猶次上游。欲叩營門  
獻奇策。書生命不合封侯。

江南乍見經烽火。直北俄聞動甲兵。拱極星辰愁失位。環城  
將士忽空營。中持和戰原非計。不在恩威始乞盟。我正艱難  
渠跋扈。海疆此後患方生。

屢思蹈海愁鯨鱷。欲作還鄉滿虎狼。身世已窮惟欠死。乾坤  
多事亦徒忙。昔年朋輩今殤鬼。昔日湖山新戰場。要覓目前  
乾淨土。滄波一片浸斜陽。

偏隅尙得爲安土。避地還能作寓公。憂世豈真無賈誼。交  
早已薄揚雄。萬方戰伐悲新劫。一代文章有變風。苦向諸君  
相告語。要將何策翊昌隆。



能爭運數扶衰局。要靖艱難造此方。自古將才生亂世。卽今  
阜隸起戎行。朝廷屢詔搜巖穴。草野何人動廟廊。天下  
事真從此壞。倦開醒眼閱滄桑。

喜周毀甫至上海

喜爾能來此。孤身脫賊邊。相逢多難日。還望中興年。吳越無  
全地。東南僅此天。爲談兵火事。涕淚各潸然。  
世情不可問。相見且銜杯。離亂真同夢。憂虞總損才。風塵奇  
士困。忠孝寸心哀。再造知何日。皇天正釀災。

我生

吁嗟乎我生。何不銘金石。乘風雲勒功。燕然成奇勳。拜手虞  
廷襄邳治。廣颺殿陸典。謨陳不然生。在昇平日。讀書識字勤  
耕耘。飽看吳越好山水。沒齒不見兵戈塵。何爲厄運丁吾代。

十年楚粵揚妖氛。皇穹忽傾大地裂。東南此日無陽春。天心  
視民若芻狗。方以肅殺行至仁。嗚呼我生早知有此日。禍福  
倚伏如相因。寇災卽由吏治始。積弱生玩多因循。朝廷粉飾  
諱兵事。保疆一切等具文。牧令初無專閫寄。權輕責重名空  
存。前者曾獻二三策。譏以無病爲吟呻。事急委任又大謬。坐  
使虎豹當門闥。紛著赭冠逐賊騎。徒揮白羽驅市人。平時籌  
備百無一。空眷赤手豈能軍。志長才短惜孤立。只辦一死酬  
君恩。誰居上游棄不守。坐令流毒殃吳民。往談經濟何慷慨。  
迎合主旨原非真。眼看四郡成白骨。偷活局外置弗聞。猶復  
植黨互訐劾。公論終在國法伸。吁嗟金閨我鄉國。迴首浩浩  
烽煙昏。繁華旣同灰燼滅。親朋化作青楓燐。賊旣踞城還掠  
野。逃亡八九成空村。我姪混跡匿蓬蒿。我姊盡室徙江津。貧



者結筏富者艇。菰蘆深處如鸞躡。我母耄年遊此變。爲話兵  
火多酸辛。我居此間尙甯謐。敢幸安聚忘離分。吳城三月火  
未熄。江頭望斷援軍屯。昨日客來示賊狀。縱橫涕泗沾衣巾。  
丈夫拔劍誓殺賊。逕持寸鐵奔狼羣。手梟賊頭擲帳上。功成  
卻賞名甘淪。不知我志果否遂。母在未敢輕此身。吁嗟乎我  
生正值亂離日。長此局促海之濱。

何年

離亂時光百慮侵。獨從中夜發哀吟。何年江海消兵火。已覺  
文章變徵音。養士朝廷終食報。降才天地豈無心。會看否  
極名賢出。手障狂瀾挽陸沈。

喜姊氏至自吳村

涕笑無端孰我憐。今朝江上至吳船。死生骨肉重相見。驚喜  
家鄉尙得全。差幸賊邊存老友。却愁亂後送華年。此身可是  
閒無用。爲撫頭顱一憮然。

贈金陵汪大燕樓

汪郎矯矯稱奇特。雙腕云有百鈞力。結髮從軍意氣豪。平生  
志早吞虜逆。倚馬草策獻軍門。欲使海內靖鋒鏑。一自從軍  
不得意。乃來滬地溷蹤跡。相逢忽在酒家樓。談兵酒半動顏  
色。吾謀不用氣沮喪。飄零市上無人識。東南一隅今重鎮。賢  
豪於此集裙屐。左家昆季俱好事。長者經濟尤無敵。一見汪  
倫盡傾倒。痛哭高歌傾一石。有時擊劍向伎堂。裸身大叫劍  
光擲。仕女寫出媚可憐。疆作腐儒弄筆墨。燕樓工畫仕女嗚呼當今  
吳越苦烽煙。何不荷戈去殺賊。

送左大孟星回湘鄉

蘅華館詩錄卷三

六

波園叢書



君家好兄弟。與我最相親。離亂逢知己。艱難見性真。兵戈橫  
南北。天地正風塵。同有飄零感。迺迺到海濱。

世尚攻文字。時方重將才。楚南兵可用。薊北纍誰開。報國  
廉頗老。陳書賈誼哀。撫時堪一慟。欲別更徘徊。

名父須承業。偏親尚在堂。蒼黃走吳越。豐稔念江鄉。何處無  
兵甲。當秋足稻粱。好爲天下重。且復罄離觴。

哭舍弟諡卿

弟名利貞。字叔亨。少承庭訓。年十五子授以帖括。性  
慧能文。而浮沉童子軍中。卒未有成。卒年二十有七。  
時庚申八月八日也。嗚呼。余上有三兄。皆不幸早殤。  
僅一弟。而天又奪之。孤雁哀鳴。其何能已。

惟我與汝耳。汝今又已矣。汝才非後人。汝質亦素美。少小侍

親愛。失學從此始。趨踰爛禮節。塗飾尚綺靡。此志一務外。遂  
致疎書史。家貧作蓬轉。往還道涖水。在路負駒光。漸壯增馬  
齒。我既困飢驅。汝亦誤跣弛。滬上况繁華。鴉雀聲如市。碌碌  
餘子中。誰其爲國士。猝爾遭亂離。更使煩憂起。一病迄不痊。  
雖沒其猶視。痛殺北堂母。同誰奉甘旨。三兄殤可嗟。一个弱  
如此。衰宗安得振。時隕滂沱涕。隻鴻迷所向。此痛何時止。

從舟中望金陵諸山

擊楫中流。素志遠。片帆迅挾浪花飛。江山滿目悲殘劫。雲物  
遙天有殺機。六代興亡王氣盡。中原戰伐霸才稀。愴懷爲灑  
新亭淚。風景依然時事非。

寄湘鄉左大

避亂離憂百事灰。平生懷抱幾時開。萬言羞學縱橫術。四海



誰知經濟木兄弟友朋皆至性婦人醇酒有奇哀湘雲吳樹參差裏珍重江干報札來

今我

今我不樂天未光落月慘淡來枕旁推枕起坐耿不寐鞞履出視心傍徨明河如繩亘南北射目一星芒角白眼看乾象應人事堪怪羣公無一策名都陸沈已二年恥與逆虜同戴天州郡頻聞作盜窟江村屢告驚烽煙邇歲脂膏竭民力此日更嗟民命畢爪牙四出為搜羅供官不足乃供賊昨者將軍大出兵三日猶未行一程但看白日坐釋甲誰肯黑夜前斫營男兒事急一死耳東南大局可知矣安望危時出將才還冀破格收國士腰間雄劍忽吼鳴劍乎何事鳴不平要殺萬賊決身死好令四海欣時清寒雞失號動物蠶荒荒一白愁獨立明河無聲若倒流何年用汝洗兵甲

偈仄

宇宙日偈仄山川覺慘淒有城容盜賊無地著耕犁直北俄烽火行南尚鼓鼙餘生憂患盡轉願葬溝溪消息近來昧風塵到處迷禍原因怠玩釁早兆端倪邊患移心腹兵防決岸隄所嗟吳下地誰為撫遺黎

何處

何處能容一放狂故園迴首久滄桑已無隙地安書卷豈有深山著草堂此輩竟非同日月吾儒自合死疆場提戈便欲從戎去轉念高堂髻髮蒼

何處能容一放狂乾坤慘淡意蒼涼揮戈僅得迴三舍縮地猶嫌限一方難作神仙逃劫外愁無羽翮到君旁褰裳便欲



凌滄海。北望沾襟是帝鄉。

何處能容一放狂。河山舉目足悲傷。駐顏休乞長生訣。避世先求辟穀方。已看寰中無樂土。只除夢外長愁鄉。此身恐作逋臣老。報國思親淚兩行。

頻年

憂時只覺鬢毛非。厭聽頻年說亂離。帶甲幾疑天地滿。運籌誰答廟廊知。堪嗟吳越無完卵。尚望淮徐速濟師。祇是目前已難料。况能遠慮計安危。

吾策

財匱民爲賊。時危盜卽兵。循環機早伏。涕泣亂方生。世尚言招募。人方重權征。誰將吾策用。一爲達斯情。

至茸城擬浮鼉山未果

憂時懷抱鬱難開。到眼風光總覺衰。入世未能成獨往。談兵甘自作麤才。無情天地空生我。多故江山怕再來。消盡平生登覽興。神鼉咫尺竟空回。

有客

有客闖然來。我方治典籍。昂首驟見之。且起揖之入。據案頗意氣。尚未及論說。頤指問何書。一若甚弗屑。隨手翻一編。乃是治安策。卽舉向客言。此文茂經術。維漢賈長沙。憂世心兀艱。生當盛隆際。痛哭抉癥結。所嗟王佐材。未得躋卿列。其言不見用。偉議空今昔。經濟與文章。源流本無別。客聞一掀髯。掉頭言未必。曰。今何時哉。乃尙守佔畢。烽煙滿郊野。荒城積白骨。名都旣陸沈。旁縣告屢失。昨聞逃氓號。狂賊又四出。誅戮無遺嬰。搜掠到村僻。老者逼擔簦。壯者驅鋒鏑。將去付一



炬百里無完室。余驟聞斯言。目眦怒盡裂。吁嗟東南民。遘罹此巨厄。丈夫誓報國。何不死疆場。擲此腐兔豪。裹以新馬革。休談紙上兵。空言鮮有實。兩石弓當挽。一个字勿識。甯願持戈矛。詎肯弄筆墨。不見古賢豪。危時勵志節。祖逖夜聞雞。陶侃朝運甕。抱此澄清懷。冀與勞苦習。況今正艱虞。應不遑暇逸。何猶競文字。向人談著述。痛茲摺紳流。徒工帖不括。謬謂致昇平。和聲鳴金石。一朝事變來。束手先惴慄。上者坐因循。一死以塞責。下者圖苟全。扁舟走倉卒。彼賊豈能兵。貸死爲衝突。長驅若無人。半壁供一擲。所冀前事悞。來軫鑑覆轍。何尙昧昧然。舍本而就末。此間雖幸安。比之爲偷活。豈真能保疆。恥哉藉人力。徒以醜然面。觀彼驕盈色。况聞北來警。疑信要難測。仰觀天上星。屢吼匣中鐵。挺身赴急難。授命在今日。豈能效君輩。從容事游息。盡如君讀書。何人去殺賊。我聞頗有泚。欲答辭先竭。再拜謝客言。從今請投筆。

賊至

吏才惟見籌軍食。將畧徒聞築堡礮。賊至城空兵不戰。民窮財匱盜如毛。哭途阮籍行無地。彈鋏馮驩氣尙豪。我欲問天天不語。獨將短鬢首頻搔。

殺賊

客裏春光眼倦開。况經世亂怕登臺。江山北固虛雄鎮。金粉南朝付劫灰。遍歷艱難惟欠死。屢思著述苦無才。何人幕府能籌筆。殺賊功成奏凱回。

對酒

對酒何因再嘯歌。側身天地閱干戈。百千萬念空無盡。三十



五年憂患過，迴首已無鄉。士在傷心半，爲國家多。卽今溝壑流離者，何策使之致太和。

戲答人

士以挾貧驕富貴，犬因見怪吠衣冠。世情今日趨逾下，矯俗還當出俗看。

避居西廨和東坡獄中遺子由詩寄里門補道人

倉皇烽火逼殘春，蹈死孤臣敢惜身。報國空陳平賊論，辨冤誰是上書人。早拚骨肉填溝壑，妄冀功名祟鬼神。一切恩情盡灰冷，君親好結再來因。燈盡宵長夜雨淒，漸親厮養首頽低。書來此日憑孤雁，腹痛他年奠隻鷄。地下驚魂招弱弟，江邊收骨仗貧妻。比鄰杞菊成虛語，台葬天隨舊宅西。

別上海作

東去魯連成蹈海，北來庾信已無家。從今便作天南叟，忍住饑寒閱歲華。

吾道

吾道非歟竄海涯，窮愁不足禍相加。孤身萬里難忘國，殘夢千回總到家。末路艱難輕著述，餘生黯淡厭年華。客邊不見春光好，一任東風送柳花。

九原

路逢老媪念慈親，追憶親顏倍愴神。白髮尙看稀著鬢，青藜猶未要隨身。一生衣食無溫飽，卅載家庭費苦辛。若至九原能見面，安辭泉下奉晨昏。

餘生



餘生棲海國。殘夢落江津。未變塵中貌。空存劫外身。故人成  
隔世。異地又回春。丹荔黃蕉裏。思鄉倍愴神。

韜跡

韜跡潛形恐我知。蠻鄉風物祇增悲。破家亡命同張儉。複壁  
餘生類趙岐。亂世文章空賈禍。窮途性命尙憂時。蒼茫天意  
何從問。淪落窮荒任所之。

北望

側身北望集煩憂。留滯天南隔九州。大地春深回草木。故鄉  
亂久廢鋤耰。難言往事惟餘淚。尙戀殘生轉自羞。溝壑可填  
應早計。漫持故劍報恩讐。

到粵

龔才拚潦倒。壯歲值艱辛。世亂言皆罪。謀疎志未伸。陸機空

遇謗。王粲慣居貧。海外從偷活。因茲養性真。

避跡非逃世。逢人怕問名。已知成棄物。何得尙談兵。殺賊雄  
心在。還鄉噩夢驚。七千餘里隔。悵望暮雲橫。

浮名復何益。文字竟爲災。書未鄒陽上。情同庾信哀。離家成  
死別。蹈海豈生回。吾主終明聖。嗟予自不才。

南行

皇帝初御宇。萬物蒙休澤。微臣幸不死。避讒如被謫。倉黃作  
此行。身南心在北。矯首浮雲徂。呼天淚沾臆。中原雖曠蕩。舍  
此將安適。默自籌生平。欲訴哽未得。吾生宣宗朝。時當全盛  
極。少小恥求名。文章曾致力。所居在甫里。中吳富典籍。詩凌  
鮑謝儔。賦欲班揚敵。三上而三黜。甘心臥泉石。一朝走海上。  
生涯送潮汐。十口敢累人。兩脚驅衣食。頻歲遭艱虞。恩仇徒



感激本。以澹宕姿。俯從鉛槧役。語言辨支離。點畫須重譯。雄心無奈何。鋌險急何擇。非才固不容。自棄非關斥。朝廷方求賢。寔爲腐儒惜。狂烽煽粵西。三楚陷鋒鏑。九江俄失守。橫決莫可抑。此關據上游。形勢雄四塞。如何棄之走。肉食空誤國。金陵帝王州。乃爲豺虎宅。臣韜憤填膺。撫劍長太息。恨不效鷹隼。高秋迅搏擊。江南苟一隅。所事尙粉飾。燕雀處高堂。桑土競營織。東南互市開。重鎮誇儲積。人才等附羶。於此集裙屐。固多文字交。豈無國士識。亂世奇姿多。投筆事騎射。聞雞蹴劉琨。逐鹿斃石勒。鯁生謬見推。許身期契稷。天心未厭禍。江上橫羣逆。痛哭三吳民。生未見兵革。列城弱藩籬。雄關失扞格。潰覆不浹旬。償事伊誰責。慘罹塗炭中。居民嗟蕩析。臣韜切鄉里。悲懷曷能釋。裂眦復握拳。誓將身一擲。維時當

事者。微訪到蓬蘞。謬博愛士名。每見屢側席。一言許馳驅。冒危遽捧檄。置身豺狼近。殺賊先結賊。陳平縱反間。彼自剪羽翼。密已圍鄉兵。聯絡盡村僻。人寡擣賊虛。發遲俟賊隙。謂將制賊命。反正在頃刻。豈料讒謗興。遽已疑形跡。知多止棘蠅。不少含沙蜮。心求此何因。豈以言切直。負罪杜牧書。傷時賈誼策。見者輒詆訶。遠諒由忠感。今者藉有端。其禍且不測。扁舟抵死往。旣聞敢避匿。誰將我辭陳。披見此肝膈。豈意惜人才。乃出自異域。深知我銜冤。復閱我孤特。致詞辨再三。當路意不易。殺士等殺賊。爰書擬重辟。窮儒性命薄。勢位彼烜赫。指龜已成鼈。滄素漸訛黑。曾參竟殺人。宰予爲陳客。趙鼎附僞楚。遺山頌虜德。古今同抱痛。一喙不如百。閉置西人舍。誰來慰淒寂。百三十五日。消息漸危逼。魯連乃蹈海。倉卒登郵



船揮涕對江樹。分與永離隔。嗔吁行路難。天地皆荆棘。海濤若怒號。天風吹鬢白。飛輪激浩洋。遠帆退六鷁。斜照浙西山。遙辨蒼翠色。夜深篷背雨。併作眼淚滴。三日福州城。生聚嗟萬億。年來急徵輸。共諒閩土瘠。危峽湧雲霄。石惡多露脊。天勢作屏障。東西連削劣。絕島峙海中。新是西人關。重崗盡童赭。樓臺煥金碧。問舍有逢迎。甫集驚魂魄。主人意良厚。憐我在屈厄。譯館彙羣書。烏焉命讐覈。烽煙正瀕洞。黎元已創劇。側聞借西師。攻城多斬馘。絕江大將來。會見新壘壁。吳東疾進軍。捷書馳日夕。漸已集流離。成羣度阡陌。前時等兒戲。猶屢書奏績。吁嗟組僧材。謬廁公卿秩。遑知慎管庫。乃復效貨殖。徒能竭脂膏。從未臨疆場。所需撥亂才。造此中興秣。被迫成驅遣。應爾未能默。閏八月中旬。吳秋氣蕭滅。臣韜始戾止。愴懷所閱歷。四顧憂無端。九閩不可陟。浩歌發蒼茫。畢世阻遐逝。終荷生全恩。敢忘聖明辟。

述哀

我欲聳身凌高穹。振聲一哭。天帝耳爲聾。我欲擲身下九泉。見我慈親。兩載前容顏。嗚呼我生何不逢。盛隆何乃不自我。先不自後。有此鞠凶丁我躬。東南半壁天地頽。白日忽匿黃埃吹。儒生報國苦無術。欲縱奇聞先結賊。彼反覆者稱梟雄。卽假其手剪羽翼。此意未先白上官。誠恐謀洩身難完。冀入虎穴得虎子。誇書倉卒來無端。我未殺一賊。人殺我者先。跳身偷活南中天。南中地氣苦卑濕。疾痛并與憂熬煎。時念我母涕泗漣。嗚呼我母之沒時。同治紀元七月廿四日。其日驕陽暴如炙。我心但覺氣陰慘。汗盡化爲血淚滴。我時事正



急避匿。一斗室不能出。見母但以頭搶壁。生弗能養死弗視。吁嗟安用爲人子。我母生我五弟昆。三昆早逝弱弟存。自從弱弟前年死。我母戚戚無歡欣。眼看鄉里歸不得。親朋消息來非真。驚危焦慮損肝肺。一憂實種百病根。自父見背十三載。支持門戶多苦辛。冬典寒衣晨慮粟。何嘗一日眉頭伸。忍令含愁入地下。咄哉造物胡不仁。哀哀我母誰喚之起。無母之人長已矣。嗚呼呼母母不膺。哭母母不聞。空懷一片思母心。但於夢裏來分明。嗚呼男兒立身在忠孝。生我之恩未一報。平生萬恨填胸膺。呼天敢向皇穹告。

粵中途包孝廉

東西南北干戈裏。轉徙飄零吳越間。今日相逢萬里外。不堪重話舊家山。

到粵後寄里中補道人

此行雖好總淒孤。倉卒登程半字無。詩酒窮鄉惟有子。烽烟滿地正多虞。百年運會逢危局。兩戒山川壯霸圖。海北天南飄泊裏。幾時歸話故園蕪。

偶遣

吾舌猶存吾道孤。天教生看粵名都。涕淚肯向窮途灑。肝膽還因杯酒麤。但擅文章真下策。不更憂患笑非夫。投荒萬里成浮海。奇絕茲遊昔所無。

悲來

悲來拔劍不成歌。潦倒巖疎奈爾何。痛哭當關皆虎豹。獨拚入海斫鼉鼉。天涯骨肉能存幾。地下親朋已漸多。屏跡遐陬吾敢憾。養生正欲托巖阿。



粵中市僧書字多不可識絕無意義

錯書喜效李林甫。意造專師曹景宗。舉筆偶然思一適。只愁奇字問無從。

我詩

客來問我詩。我詩貴篤摯。譬如和太羹。其中有至味。平生所遭逢。自言無少諱。蕭胸家國憂。一把辛酸淚。書必讀萬卷。筆不著一字。從未區宋唐。惟在別真偽。我當少年日。詞亦工側媚。花月賦閒情。惟房抽綺思。甫踰弱冠年。飢驅遂入世。室無半月儲。袖減三年刺。從茲歷艱難。稍復尙意氣。躍冶動見憎。懷才安得試。逮乎憂患來。置身幾無地。冷眼識交情。熱衷絕世事。但知吟亂雜。不能飾平治。但知樂飢寒。不能炫富貴。嗚呼秋草根。聊以鳴吾志。不求人見知。永爲世所棄。客乍聞此言。悚然欲退避。揖客且閉門。將詩藏敝笥。

五月食荔支有感

嶺南荔支天下奇。昔徒傳聞今始知。或言閩蜀更勝粵。我未之嘗敢瑕疵。火山四月紅于火。擔夫入市紛道左。老饕一見口流涎。會須一啖三百顆。不煩纖爪擘絳襦。白露冰雪仙肌膚。更憐消渴溢瓊液。風味勝絕平生無。金婆楊梅等奴婢。西施玉珣堪比擬。不愁內熱解蔗漿。一枕酣回甘澗齒。幾忘被譴在炎方。爭此口腹無乃荒。東坡肯將一官擲。嗟我非才安敢望。吾聞諸楊昔橫恣。天寶歲取騰驛騎。未終一曲荔支香。馬嵬塵起蛾眉逝。誰知作俑是尉陀。貢始武皇罷漢和。盛德豈復貴尤物。厥包曾不驅明駝。人生有好都爲累。况我南行不得意。回首前年今日時。那堪對此彈鄉淚。



有感時事

兵戈滿海內。慙此走偏隅。家室知難問。親朋信漸無。文章開百粵。盜賊橫三吳。喜聽王師捷。憑城勢日孤。世事誠難料。蒼生劫未終。借師能助順。飛檄善橫攻。嶺嶠鯨鯢奮。滇池豺虎雄。書生思報國。徒此抱孤忠。

聞官軍復崑山寄里中補道人卽用其寄粵原韻

天南忽見捷書馳。喜聽崑城已進師。不用山中陶甲子。重看江上漢旌旗。中原戎馬傷多事。小劫滄桑感往時。只是欲歸歸未得。沾巾北望反淒其。

無才何敢妄談兵。但祝還鄉早息耕。何日王師休戰伐。卽時故里觀昇平。飄零遊子仍天地。勸哭良朋半死生。劫火元亭幸無恙。投書萬里見交情。

頻經逋竄隱菰蘆。肝膽輪囷尚故吾。亂世功名惟殺賊。雄才詩酒亦窮途。十年兵甲全吳困。萬里親朋隻字無。誰肯上書籌國計。流離爲繪鄭監圖。

東甌南嶠望中分。任尉城邊暗夕曛。海角騫人餘涕淚。陣前諸將策功勳。傷時賈誼過秦論。勝算廉頗用趙軍。急爲借籌須禱穴。長江從此息妖氛。

雨中得友人書并憶吳興包孝廉

時官軍進師蘇州之唯亭鎮諸鄉安集多有耕播者  
海天氣候殊中土。風雨連山六月寒。十日閉門無客至。江南書到說平安。

家鄉無恙莫歸期。便送君歸我更悲。雨里依然杞菊在。平吳猶恨進師遲。



續夢中句

已薄功名等芻狗。徒工文字學妃豨。此二句乾坤多難身還在。忠孝無成志竟違。河朔王通獻策關中龔舍美知機。從今絕口談兵事。閉戶空山對夕暉。

至粵已逾一載。辱江南諸故人投書問訊。作九言一首。寄黃六上舍潘大楊三兩茂才。

嗟我昔年出門作近遊。今乃放眼萬里來番州。不因被謗亦不得至此。天之厄我乃非我之尤。男兒墮地本是輕離別。擲身滄海何憚阻且脩。此間一島大水來環繞。茫無涯涘四顧興百憂。時誦東坡之語以自解。土三水七人本居於洲。中原理亂久置不復問。但目見優雜耳聽啁啾。我胸空洞本無一物著。憂歡悲樂境過輒不留。惟有君親友朋時在念。今日欲

思報答嗟無由。生平嗜好多足累。學問自遭放廢棄之如贅疣。吳中徵逐每苦不得息。今且閉戶任聽先生休。得聞方知一日如兩日。動必多咎惟靜可自修。有時默念我生之所作。百無一懺悔。恨兼慙。蓋嗣皇龍飛閏八月來此。迄今十月歲已逾一周。災方景物種種傷吾意。氣候不常迴非中土侔。視天常低視日近若炙。冬或著絺盛夏或披裘。魚龍怒騰欲雨氣腥臊。一黑千里颺起搖。陵邱飛蟲細蚋經冬猶不死。災飈毒霧白晝鳴。鶴鶴我初來時厭此土。性惡常畏煩熱委頓病洩嘔。瘦妻嬌女啼哭思舊土。一家四人臥床無一瘳。半椽矮屋月費錢半萬。風逼炊煙入戶難開眸。木中蟻蝨嚼人若錐利。爬搔肌膚往往至血流。出見販豎備牧亦低首。時維嘲弄譏笑開楚咻。俗惑鬼怪詐悍吁可畏。小嫌裂眦動如風。世



讐。我聽其言。一念寂不起。死灰槁木人。我兩悠悠。人生但當  
隨。時爲排遣。惟性所適。大化與沈浮。時和卽春花。開卽佳節。  
有菊有酒有月爲清秋。嗚呼古來賢豪南遷者。不免蹈海性  
命委輕舟。不見昌黎上疏乞恩貸。訴陳疾厄深慮填渠溝。子  
厚詩文滿幅皆悲怨。劍鋸割腸自恨爲山囚。盍思土著生長  
亦人耳。彼何安樂我何多煩憂。我今誇述非以動君聽。至其  
佳麗誠足甲南陔。南村楊梅北村之盧橘。香蕉黃橙不論錢  
可售。紫綃紅繒徑寸之荔支。玉玃下酒風味欺蝻蚌。粵西善  
鮪粵東尤善鱸。薄肌細理沃醪雜薑蓴。此其小者不過誇口  
腹。若臨山水閱歷深綢繆。此鳥已非我。皇之疆域追論價  
事令我久啣嘆。從來誠信足以禦四裔。獸窮則攫毋怪稱戈  
矛。彼公將畧稱爲不世才。胡乃出此天意非人謀。至今溟滂

波恬息猜訝。駐以重兵建置由豪酋。經營廿年蓄意善招集。  
蠓灘鰲背開此風光幽。買胡居奇光怪炫列貨。四重金碧多  
喜居層樓。天下兵動江折又塗炭。衣冠避宦經此盟海鷗。吾  
聞五羊城。中仙下遊最好深宵風。月珠江頭孟冬朔日海嶠  
風始寒。我來憑弔直欲驚蛟蚪。今昔江山不改霸才去。前甲  
任趙後又悲孫劉。龍川一尉崛強不臣漢。陸生掉舌折服功  
可俟。孫吳區宇幾盡奄南服。始築城垣闢地民居稠。李唐未  
造。居民忽鼎沸。嗟哉黃巢一炬遭踐蹂。不知禍亂乃以開英  
傑。劉隱乘時竊據雄上游。中朝人士流寓爲謀主。一時二嶺  
五管指掌收。玉堂珠殿土木疲民力。鼠入牛角國勢漸不適。  
天水真人崛起混宇內。珍異盡輸天府輦琳瑯。興亡轉瞬小  
朝廷日蹙。八閩旣覆於此。暫逗遛。崖山忠憤千古泣神鬼。慈



元殿燼廢寢迷松楸。有明君臣。妄冀挽天運。崎嶇鯨足。稱帝  
誠苟偷。螢光燭火。豈得爭日月。唐殲桂檣。萬載輦。皇旣平  
南開藩。晚節壞孽子。富貴豪華。頃刻同蟬蛸。荒宮古屋。寂寞  
作官廨。烟沆石獅寒。雨啼林鳩。欷歔懷古。合人意盡矣。感愴  
身世。瀛海一浮漚。人才渺然。吾未得見之。重崗窮另。地氣少  
淑柔。慷慨疏爭。是真奇男子。當時名儒。挺出炮魯鄒。詩家大  
宗。獨數梁陳屈。海雪畸人。一死志莫酬。山川寂寂。倏馬二百  
載。坐令此輩。曠世渺無儔。返轡歸來。兀坐塔若裘。辱君書札。  
萬里遙相投。急呼燈讀。數行猶未盡。鄉淚如綆。昏眼嗟頰。揉  
昔賢欲以文字開要荒。結茆作屋。墾土爲瓜疇。視若鄉里。其  
意豈不好。咨嗟自審。吾念獨曰不。側聞王師每戰。動獲捷。  
士氣奮揚。中外胥同仇。三吳版籍。收復已逾半。流氓安集。農

女勤蠶。寇衰勢窮。各將鳥獸散。中興繼烈。佇見脫樊籠。衆  
樂昇平。悲我不得預。尚冀聖恩。祝網開蛛蝥。我本三吳。甫  
里之狂客。盍容我歸學圃。安鋤耨。空抱此願。未識何時遂。鳥  
驚弋繳。獸恐罹罟。粵雖全盛。邇來亦小減。轉饒七省。大吏  
煩徵求。時艱才出。此事每束手。惜民一疏。勇退辭節旂。嘻吁  
今日。非猶昔之比。安得鄭俠。繪圖陳冕旒。書生饒舌。豈不憚  
罪戾。不知自有肉食爲國籌。終年俯首。讐校已短氣。近輯尚  
書。真僞誰彈糾。河東書篋。十未得二三。那能一一備。我恣羅  
搜。勞君馳寄。慰予遠望懷。詩罷但聽屋角風。颼颼。

聞官軍收復蘇州有感

金閭重鎮扼三吳。因壘增師賊勢孤。已見降幡連夜出。早傳  
露布萬方呼。壞雲壓堞奔豺虎。殺氣沿屯走鼠狐。從此閭閻



靖烽火。耕桑好納太平租。

滔天書竹罪難窮。貸死誰論斫賊功。窮寇難逃甘下策。危時能斷具深哀。菑蒲一例消萌孽。將帥頻年用戰攻。非種誅鋤仁術在。伏辜慢與殺降同。

燬火騰空賊膽消。橫江組練繡旗飄。安危大局關天下。焦爛餘形答聖朝。奉詔已書蕃將績。收功轉患客兵驕。羈縻長策時難用。誰識江充論最超。

大江計日掃長鯨。細柳猶連上將營。吳越未全歸版籍。臯夔何策答昇平。卽今畿輔須儲粟。况復關中尙用兵。益旅輸金厪宵旰。杞憂豈合到儒生。

與人書不答

未應韓老偏疎我。應是嵇生懶作書。誰惜寥天囚獨鶴。翻嫌

多事遣雙魚。論交四海輕劉備。乞食窮途泣伍胥。萬死投荒豪氣在。無求終歲閉門居。

元修契順從來少。趙德符林亦未逢。一字懼爲他日累。此才轉賴異邦容。文章豈必關科第。風義原難望俗庸。被譴何因緣語禍。敢輕出口誦渠儂。



蘅華館詩錄卷四

長洲 王 韜 仲 弢

從茲

平生忠孝師賢聖。今日飄零絕見聞。噩夢中宵呼殺賊。孤懷  
九死敢忘君。開樽斗室參黃檗。閉戶空山臥白雲。痛絕古  
來文字禍。從茲筆研總須焚。

粵中贈卓司馬

離家萬里到南荒。九死艱難托異方。吳苑鶯花迷望眼。蠻鄉  
風雨割愁腸。人皆欲殺誰知我。才不能奇未敢狂。溟渤卽今  
鯨鱷靜。孫劉割據跡蒼茫。

極目關河感慨中。賈生死去霸才空。憂時誰上安危計。報國  
徒聞戰伐功。已憤勳名成畫虎。敢輕詞賦薄雕蟲。屈騷苗裔  
蘅華館詩錄 卷四



開南服。忠愛流傳自不同。

尋常豈具封侯骨。甄識還憑相士書。卓精相術亂世公卿安有種。

無才巖壑且深居。鳶肩誰識風塵誤。馬齒空嗟歲月虛。放逐

江湖甘老死。於茲卜筮定何如。

感懷身世如塵夢。閱歷憂危託嘯歌。幻想都從奇境出。才人

自古寓言多。卓示詩二千餘首。多涉神仙夢幻。英雄失路逃仙佛。造物何心

竄谷坡。淒絕瘴煙荒雨裏。閉門經歲獨君過。

### 送閔孝廉回湖州

客中送客難爲別。况我欲歸歸不得。雲水迢遙七千里。夢魂  
夜夜返鄉國。天遣先生避地來。雲萍海角初相識。中原多事  
方用兵。末路才人悲失職。彈丸絕島等桃源。暫此勾留能守  
黑。天心似欲開昇平。早合吳越烽煙熄。百戰湖山幸無恙。深

閔重有人相憶。忽然思發孝廉船。徵書捧到動顏色。十年未  
踏京華塵。蓬瀛咫尺人先涉。知君歸去旋出山。蒼生滿眼瘡  
痍劇。把酒臨歧獨惘然。便送君歸更淒惻。望帆直去海之涯  
我自天南君自北。

### 包孝廉以足疾久不得來作此詢之

北走燕市南粵江。兩脚曾輕萬里路。竭來日日閉門居。咫尺  
天涯窘跬步。不見包咸兩月強。爛繫鞋出足生瘍。打頭矮屋  
住不得。如鳥在籠終思翔。郎君刀圭推妙手。小試其技此何  
有。奈何久爲鷓鴣蹲。讓渠自作牛馬走。一從君閉新婦車。酒  
爐冷落茗椀疎。王郎清饒虛大嚼。天寒正思鱸河魚。昨過屠  
門忽短氣。食指雖動無異味。待來不來知未能。畢竟家居作  
何事。車若水有脚氣集。習鑿齒著晉春秋。君才不後古作者。



論語半部須君修。

一生

客粵無端歲屢更。遙從物外寄閒情。棕櫚雨過涼初覺。蒼荀風來香自清。賣藥韓康空遁世。入秦張祿本無名。逢人怕說飄零事。總是儒冠誤一生。

七夕

香几瓜筵月二更。填河靈鵲駕橋成。已深兒女飄零感。難免神仙離別情。花外笙歌添客思。樓頭琴語帶秋聲。一年相見尋常事。料得雙星尚未行。

有乞作香港竹枝詞者口占答之

絕島風光水面開。四重金碧煥樓臺。海天花月殊中土。誰唱新詞入拍來。

有李氏女子自揚州來此作校書贈以三絕句

阿儂生小住揚州。只解相思不解愁。姊妹飄零夫婿死。天風吹下粵江頭。

揚州此日等天涯。愁說揚州是妾家。怨殺春風供飄泊。李花今已作楊花。

何三招赴綺筵。卽席作此。

脆管繁絃永此宵。留賓投轄醉相邀。玉容自許春如海。金醖休辭酒似潮。南國笙歌聲變徵。北方戎馬勢猶驕。海天別覺風光好。尚有閒情問紫簫。  
鴛鴦修到得雙栖。環燕從渠自品題。璧月當簾圓皓兔。玉鉤隔座警靈犀。桃花已忘風前面。柳絮曾沾雨後泥。一任箏琵琶響集。曲終溝水各東西。

蘅華館詩錄

卷四

三

張園叢書



竭來海國又深秋。畫裏山川一望收。遠火樓臺看隱約。當筵  
花月儘勾留。江湖跌宕餘豪氣。身世飄零感舊游。縱有素心  
無可託。好尋烟水結盟鷗。

題湯雨生都督所畫紅梅花

毘陵將軍冰雪姿。清操惟許梅花知。平生豪氣鬱不發。驅使  
十指生橫枝。老幹槎枒肯受屈。如竹秀逸松支離。著花自作  
娥媚態。非似寒女強入時。我聞將軍罷官後。所娛三絕書畫  
詩。性解好文不好武。但自游戲供臨池。有時潑墨作屏幃。興  
酣落筆何淋漓。此幅渲染意迥異。將謂俗眼工相皮。詎知神  
韻更超絕。冷香拂拂寒鬚眉。年來塵土斷清夢。披圖一見神  
爲馳。憶昔命儔遊白下。將軍高臥秋江湄。招延近局作雅集。  
東南壇坫此主持。閩中筆法亦清挺。唱和猶存琴隱詞。曾幾

河山忽破碎。滄桑人事增吁悲。將軍節與梅花似。芳心勁骨  
同爭奇。幸逃劫火有此冊。摩挲千遍空懷思。

題湯雨生都督留別吳興諸子詩札

將軍向以文章名。胸中所有非甲兵。吳興山水擅天下。宦遊  
猶得娛閒情。羸官亦期不朽業。良友名山供作述。平生悔到  
此方遲。天末浮萍溷踪跡。皆都督詩札中語其時將軍初罷官。九梅  
餞別東風寒。畫工繪圖尙好事。想見當日疆圉安。吳越鶯花  
正滿眼。如帶長江天塹限。秣陵城中作寓公。琴隱叢書方論  
撰。忽然烽火耀江頭。將軍一死成千秋。吳興兵劫亦相繼。泉  
石荒涼失舊游。今日讀詩重嘆息。如此風流真歇絕。江山無  
恙昔人稀。掩卷還君淚嗚咽。

題姚慧田徵君所書詩卷



乾隆初襍盛文學。義門記誦尙簿錄。沈陳繼之爲高足。姚君最後稱私淑。姚君少有國器名。讀書是重科第輕。晚邁流離業益進。詞章足與千秋爭。生罹疾厄鬼伯守。長年藥裏不去手。我才不用困奇窮。知己無人失良友。前稱姚王後陳姚。浮名雖重猶蓬蒿。隻輪孤翼無所向。長途風雨愁飄搖。薦舉未赴甘不仕。才人失意揚州死。馬張風義當時稀。收拾遺豪爲傳梓。身後荒涼更足悲。蓮花莊圯少人知。流傳尺幅南天見。索我題詩涕淚垂。我生况復遭離亂。六載炎荒音信斷。自從兵燹失圖書。那有心情託文翰。姚君身世感相同。雲萍踪跡流西東。讀詩既罷三嘆息。但聽風急呼寥空。

題金壽門手書詩卷爲包茂才作

冬心三絕書畫詩。天姿所造稱逸奇。就中畫筆尤擅譽。乃其

承法非一師。字體結構頗樸媚。涉古卽古稍矜意。榜崖作手推清新。賞誦不足爲寫記。我聞翁昔作遠行。途窮賣畫揚州城。一朝落魄晝失色。城中無人知姓名。德州大夫偶見面。縱橫筆力驚奇變。招延幸舍爲唱提。聲價日高黃金賤。其時禺筵盛南綱。風流接納開壇場。瑄璐昆季並好事。小玲瓏館多儲藏。一壞再壞人事改。妖火騰天倒滄海。圖書秘玩付一炬。尋常器用無人買。竭來此冊留南陬。跡少視與拱壁侔。摩挲兩眼就燈讀。對之令我生煩憂。平生積聚燬兵劫。先民遺墨誰收拾。君家插架亦散亡。尙存癖嗜勤搜集。鄉里易結香火緣。異方見之心懔然。浙人愛浙非阿好。其人造詣良足傳。流傳况當劫灰後。尺幅精神百年久。留待他時勒石垂。合竝姚君兩不朽。

與姚蕙田所書  
詩卷共裝一軸



即今

濡筆先成鏡吹詞。即今四海慶清時。重編同治中興集。久薄  
元和聖德詩。前代武功誰足比。遠方長技亦堪師。古來風會  
茲初變。造物無權任轉移。

到英

歐洲盡處此巖疆。浩盪滄波阻一方。萬里舟車開地脉。千年  
禮樂破天荒。山川洵美非吾土。家國興哀託異鄉。海外人情  
尚醇樸。能容白眼阮生狂。

寒食

我生三十九寒食。強半牢愁在客中。今日况經來海外。何時  
重復到江東。佳辰杯酒從誰乞。異域桃花未放紅。苦向東風  
問消息。時家書久不至不堪迴憶愴心胸。

何日

七年孤負故鄉春。到眼風光客裏新。兩戒山川分北極。自英  
格蘭島以往一洲疆域限南輪。殊方花月離人淚。異國衣冠  
即近北極獨客身。何日淞濱容小隱。柴門歸臥穩垂綸。

讀江弢叔伏敵堂集即書其後寄潘茂才

七萬里程來海國。旅中書籍難多攜。寄船三篋我手檢。但有  
經典無文詞。殊方春色入花柳。到眼忽觸羈人思。便想吟哦  
涉柔翰。三日未得成一詩。已將此心役箋注。鄭服李杜分鑣  
馳。昨者登山豁遠目。好句未答山靈知。今朝有信中原來。信  
高一尺方猜疑。開緘喜得伏敵集。乃是潘子江南貽。怪底函  
中發光怪。恐於海底驚蛟螭。平生服膺惟坡谷。昌黎子美我  
其師。江君詩派宗四家。四家筆以一手持。言情彌真始見我。



造格特朔乃能奇。槎枒盤空挺勁質。鉛華洗盡呈瑤姿。煙雲  
風月江湖海。窮愁疾苦憂寒飢。寫之筆端出新意。一一酸入  
人肝脾。此才今無古亦少。深悔向來危失之。江君昔及先子  
門。文章卓犖稱於時。學成出行遊燕閩。隔絕南北稀見期。江  
君於我十年長。我學慙未窺藩籬。父死家貧亦蓬轉。乞食重  
去滄海湄。丁歲記俱返家街。江君剝啄來歎扉。渠方入貲爲  
小官。我正病足休征鞿。出圖徵詩譽我作。謂宜佳處求癡疵。  
其集編年已束筍。留置我案時覽披。愛玩不足更寫錄。傳鈔  
右手爲生胝。顧未若今大哀痛。豈由身世逢亂離。同丁鞠凶  
遭奇慘。理易相感針投磁。如我口之所欲吐。不忍卒讀流涕  
洟。自古傳人必忠孝。血誠不隨流俗移。夙生自負秉微尚。一  
跌瓦裂徒嗟哈。竄迹蠻方久偷活。愁邊屢見更寒曦。親朋消

息雜悲喜。苦念鄉土無時歸。昨歲吳蒙爲我言。江君客死天  
南陲。身淪並使厄其壽。造物刻酷誰所司。算年僅至柳子厚。  
結友更無張叔威。境同才異遭忌一。踟促人世初何爲。九閩  
蒙蒙不可叩。放聲一哭形神癡。嗟今長行適異域。去家益遠  
心彌悲。豈如潘子守素業。臯比坐擁豐脯貲。入就兒女索啼  
笑。出交賢彥翮追隨。因悼江君念潘子。死者已矣生者睽。安  
得歸耕臥淞水。一笑重把寒窻卮。

自題小象

九萬滄溟擲此身。誰憐海外一逋臣。年華已覺隨波逝。面目  
翻嫌非我真。尙戴頭顱思報國。猶餘肝膽肯輸人。昂藏七  
尺終何用。空對斜曛獨愴神。

安得空山證夙因。避人無術且依人。有生已受形骸累。到死



難忘骨肉親。異國山川同日月。中原天地正風塵。可憐獨立蒼茫裏。撫卷聊看現在身。

遊杜拉山麓循澗而行。

今朝縱目涉烟巒。景物殊方詎異觀。故國河山消戰劫。邊隅草木入春寒。林深鳥自鳴幽谷。水急魚難上釣竿。同遊者釣魚不得循步沿溪尋去路。不辭仄徑獨孤盤。

偶涉一土阜陷淖中戲作

披榛便識非通徑。陷淖幾驚作半人。到此已難尋退步。慙余隨處值迷津。不攀藤葛求容足。終拔泥塗肯辱身。本是探幽翻蹈險。却猜山鬼故予瞋。

一慟

七萬里程未云遠。五千卷書安足多。厭生斯世閱離亂。容老

此鄉當嘯歌。避地避人昔豈料。報親報國今如何。臨風一慟。飢復爾傷已憂時志不磨。

目疾

自昔觀書眼倍明。况經雲水洗尤清。如何萬卷坐相對。反覺雙花眩漸生。口耳俱窮惟恃目。瘡孽已備慮兼盲。此不解。方言故云。問誰借取金篦刮。好注邱明內傳成。時暮春秋左氏傳集釋

瞥見

夜坐正思睡。寒燈倏忽閃。瞥見一家人。笑語互相勉。倏爾牽袂至我前。恍惚夢蘅之容顏。中外相懸七萬里。生死相隔十九年。胡為乎來。我心孔哀別汝已久。心亦漸灰。今夕燈下驟見汝。或生或死。殊驚猜死者。冥漠歸泉臺。生者潦倒猶蒿萊。生者哭死死不知。即欲不哭淚自滋。自汝死後困益劇。家室



此離不可說。所娶林家妹。乃汝之所識。其時髻雙丫。剪髮正垂額。佐子持家計。頗不憚辛劇。家貧逢世亂。死喪迭相值。庚歲弱弟死。壬年阿母沒。我亦逃炎荒。永與邱墓隔。滄波淼淼。適異洲。家鄉不見使。人愁汝來。我願同汝去。毋令在世多煩惱。

遊倫伯靈園 有序

去杜拉十二里許。有地曰倫伯靈。譯卽行雷橋。名勝所也。境旣幽邃。候亦涼爽。每至夏日。都人士女挈侶來遊。藉以道炎暑而消長日。其地有客舍數椽。可供遊人小憩。舍旁一園廣袤無際。就山麓爲之結構。徑路曲折。高下幽奇。可喜稍加人工。而無不出自天然。一澗濼澗。千峰合沓。偶入其中。爽氣撲人。塵念俱絕。

有飛瀑數處。從高注下。鏗訇盈耳。顧聲喧境靜。仰觀俯聽。其趣頗永。沿澗傍山而行。約十數里。行盡處。境忽窪。下匯作一潭。以承水。水從石竅中。怒噴而出。遙望之。作白練一條。惜不甚長。且耳。水注潭底。跳珠噴雪。聲轟晴雷。土人謂之大鏡。以其水聲若沸也。兩旁巨石嶙峋。潭底石齒齒。露須下踐。潭石面壁。正觀乃盡其妙。蓋此山之奇。固以飛瀑著名也。時同遊者理君雅。各媚梨女士。

同治戊辰夏五月。我來英土。已半年。眼中突兀杜拉山。三蠟遊屐聽鳴泉。巖深澗仄勢幽阻。飛泉一片從空懸。我臨此境。輒叫絕。頓洗塵俗開心顏。居停主人雅好事。謂此未足稱奇焉。去此十里有名勝。風潭廣斥萬頃田。上有飛瀑如匹練。下



有雜樹相媚鮮。爰命巾車急往訪。全家俱賦登臨篇。其日佳  
客踐約至。遂與同載揚輕鞭。初臨猶未獲奇境。漸入眼界始  
豁然。意行不問路高下。疎花密蔭如招延。澗窮陡轉更奇闊。  
恍惚別有一洞天。水從石竅疾噴出。勢若珠雪相跳濺。至此  
積怒始奔注。一落百丈從峰巔。側耳但覺晴雷喧。聲喧心靜  
地自偏。逕穿犖确躡澗石。獨從正面觀真詮。四顧幾忘身世  
感。來往忽冀逢飛仙。萬山擁翠若環合。中有一朶芙蓉妍。惜  
非胸中具邱壑。坐使腕底生雲煙。媚梨女士工六法。時女士  
攜筆馬  
本圖定能寫此圖。其全勝情妙墨發奇想。蓋將造化形神傳。  
嗟予窮陋世所棄。胸貯萬斛憂愁煎。山靈出奇爲娛悅。令以  
文字相雕鐫。我鄉豈無好山水。乃來遠域窮搜研。昨者家書  
至海船。滄波隔絕殊可憐。因涉名區念故國。何時歸隱江南

邊。

遊園翼日忽得家書口占二絕句

一從客粵念江南。六載思鄉淚未乾。今日擲身滄海外。粵東  
轉作故鄉看。

昨涉名園慰旅情。正將秀句答山靈。家書寄到愁千斛。一片  
詩懷化涕零。

獨登杜拉山絕頂

濟勝慙無腰脚健。探幽陡覺心胸開。泉聲若共石門激。嵐影  
時與雲徘徊。眼前已覺九霄近。足底忽送千峰來。天悅羈人  
出奇境。家鄉不見空生哀。

二月自英返粵

萬里征程獨往來。四年離緒已無涯。西歐風土歸詩筆。南國



笙歌攪客懷。偏覺人情重。至熟不知歸。願幾時諧。花田香夢。珠江月。相約清游未便乖。

縱有

飄零身世渾如夢。憂患文章總損才。多淚唐衢常欲哭。無家庾信自言束。見聞海國初編史。時子力擬輯撰四深補乘潦倒窮途獨舉杯。縱有浮名亦何益。百年隨例總塵埃。

久甘

秋風何處憶萼菰。鄉味蕭然興益孤。天付窮愁磨傲骨。我從詩酒得亨途。驕驕豈肯儕駑馬。鸞鳳何曾狎野鳧。芥視千金空鼠嚇。久甘老死在江湖。

題扇三絕句

一騎匆匆去海東。自憐無地著英雄。窮途落魄誰相識。反出

裙釵冷眼中。虬舞公

流水高山寄所思。獨彈古調不求知。從今且袖宮商手。夔曠

登庭出未遲。彈琴

洗盡鉛華時世粧。自憐生早閱冰霜。芳心勁節無人賞。獨壽

空山送夕陽。梅花

贈大羅山人即題其小象

大羅山人何雄豪。偶然落筆多清超。詞章已足了餘子。意氣往往輕凡曹。堂上屢添元鶴奠。庭前况有雙鳳毛。向平婚嫁已將畢。登山臨水堪逍遙。我客天南溷萍跡。姓名早被山人識。謬賞才華說項斯。辱遣追陪接壇席。琴尊跌宕綺筵開。文采風流好標格。志遠翻為絕島游。才高不射京華策。維時我欲去歐洲。征途風雪黯登舟。瀾渺煙波隔萬里。一扇琳瑯寄



別愁

丁卯仲冬余作秦西游山人書卷見胎

天涯返權重相見。苔岑異地增淒

戀。鄉憂突兀心胸間。年來莫怪新聲變。出圖徵詩我敢辭。山

人期許麤能知。思以文章來報國。金石刻畫鳴昌時。讀書

十年不得意。感懷空灑憂時淚。小隱無端向海隅。從此長藏

我劍利。玉筍聯翩並俊才。交柯珍木非凡材。一經教子有真

樂。何難平步升蘭臺。人生難得幾知己。落落乾坤我則已。會

當長揖辭山人。有田不歸如江水。

用東坡句

送陳琳川司馬秦岷從軍滇南

陳侯才畧稱縱橫。胸中所有皆甲兵。讀書思以經濟見。處世

弗欲文章名。方今滇池盛豺虎。連天鞞鼓愁邊聲。元龍豪氣

薄雲漢。攬轡壹志圖澄清。輸金既上下式疏。投筆巡請終軍

纓。法郎火器出西法。特獻長策破敵營。揭來香海喜握手。獲

傾襟抱聯交情。春風故里二三月。忽忽旋唱驪歌行。書生報

國在殺賊。天戈所指奇功成。濡毫為賦饒吹曲。從君逍遙

歌昇平。

元日借珠浦詩人遊西人別墅

元日登臨眼界開。春光元自海邊回。又看見女青紅換。錯認

神仙眷屬來。別墅中多西國女子共地園亭殊結構。良時裙屐快追陪。

客中偏覺東風早。且罄屠蘇酒百杯。

題海天五友圖

余與羅錦村少尉陳星藩上舍張芝軒少尹梁智芸

茂才。以西法影像。合印一幅。名之曰海天五友圖。

海日杲生自東。海天空濶浮鴻蒙。雲萍踪跡忽相聚。乃得

五友苔岑同。大羅山人氣卓厲。偶然揮灑煙雲麗。眼看同學



凌瀛洲。如此才華艱一第。元龍豪氣湖海流。自築百尺之高樓。陶朱有術亦足習。風雅好事誰其儔。芝子翩翩最霞舉。髣髴當年有張緒。晶窻曉日畫眉來。玉樹臨風夙心許。鸚也雄才一石豪。不甘小戶稱老饕。就中年少志獨銳。當秋盼汝青雲高。而我風塵多轍坳。十年迹跡成名寡。報國文章虛語耳。徒嗟潦倒菰蘆下。

### 哭伯姊

伯姊名媵。字伯芬。適吳村周氏。向以財雄。今已中落。余至粵後。長甥以溺於片岑死。姊倩以溺於酒死。而仲叔二甥又不相能。家驟衰。癸酉六月伯姊患喉症。遽殞。年四十有九。

我生同氣僅三人。上有伯姊下有弟。姊長三歲弟溺六。中有一妹。

未期而殤。

家庭嬉戲增愷悌。姊去淞濱我滬濱。從茲相見多艱辛。良田百畝足自活。衣租食稅原非貧。夫君讀書罕出戶。食古不化性迂魯。三杯濁酒入肺腑。怒氣如雷吼若虎。烽火江頭一旦驚。僻居鄉落尙安平。門庭乖戾咎微見。先折長枝到長甥。子死夫亡痛相繼。手足傷心睽異地。忽然遠道寄吾書。讀不成詞但有淚。其日剛游濠鏡回。連山風雨益生哀。從此容顏真渺矣。相思只合夢中來。正期白首重相見。不謂青鸞疾於電。吾生悲憫無窮時。遙天孤雁鳴聲變。秋風十二年前別。明月七千里外圓。月不共兮風不知。人間地下兩茫然。

### 贈越南黎和軒侍郎卽送歸國

奉使南來識絳旌。屢瞻珠玉快揮毫。文章蓋代才無敵。風月賞秋品最高。兩載賢勞完素志。寸心忠愛託離騷。轄軒盡入



皇華詠。爲聽清音想鳳毛。

海天風景足勾留。水國蒼茫一望收。臺榭遙看依澗壑。姓名早已滿滄洲。長籌經濟推劉晏。末路飄零識馬周。知己他鄉今幸邁。追陪儘許日登樓。

早年清譽動朝端。雅愛登臨拄笏看。畫裏山川詩卷富。客中歲月酒杯寬。絲綸濟美思張說。裙屐風流屬謝安。此後相思託雲樹。滄波瀾渺海濤寒。

忽唱驪歌遠思催。臨歧執手重徘徊。惟公愛士真如古。愧我能言未是才。久臥江湖容避世。似聞廊廟正需才。扶輪大雅今堪繼。珍重江天報札來。

送越南潘九霞農部回國。卽和其辭別原韻。

今春瞥如疾隼過。已非四月時清和。一兩三日不出戶。出風

欲作海始波。焚香掃地聊自得。讀書而外焉知他。叩戶忽傳遠客至。趨迎禮數毋嫌多。袖中新詩出相示。格調纏綿性情摯。上言此日已將歸。下言何日得重至。南國多才洵足誇。一代文章見清麗。翰墨因緣海外求。苔岑異地成交契。嗟我近年多坎軻。拔劍斫地徒狂歌。夙慕清談效魏晉。脫畧儀節指煩苛。四海澄清容石隱。昇平久已銷鉅戈。讀君詩句知君學。倒流三峽傾天河。况君遠使宣宏猷。一見心許欽風流。胸談欲吞小五嶽。姓氏早播大九州。鯁生獨幸接丰采。感君將去不可留。驪歌載道送君別。依人王粲還登樓。

題友人畫扇

剩水殘山劫未終。滿盤殘著亂匆匆。美人到底知儂意。合遣鴉兒策上功。

衡華館詩錄

卷四

十四

張園叢書



無求

十年離別舊家園。終歲蕭然獨掩門。有價始知官長賤，無求轉覺布衣尊。稻粱一輩爭雞鶩，風雪空山侶鶴鵲。飄泊天涯歸計阻，江湖高臥亦君恩。

哭亡女茗仙

茗仙余長女也。名婉，以丁未仲冬生。為前室楊碩人所出。年二十有二歸吳興茂。才錢徵，嫁甫十年而殞。我生五十僅兩女。長者已嫁少者未。長者自幼頗讀書，唐詩約略，麓能記。生年四歲，痛母亡，大母顧復心，徬徨從我至粵甫及笄，風波萬里來蒼黃。六載炎荒隔人事，枕函時濕思鄉淚。我去歐洲隨母歸，滬濱便是重游地。年長無如擇婿難，儒生品格求高寒。吳興茂才才卓犖，文章早已雄詞壇。絲蘿既

已附松柏，容顏從此天涯隔。膝前兒女粲成行，蘭芽玉樹珍如璧。伉儷情深慰遠懷，全家渡海省親來。寄書不如見面好，小住四月愁容開。一別誰知成永訣，病骨纏綿望久絕。西風十月海波寒，一紙魚緘眼中血。迴視少女心彌悲，嬌癡永此閉深閨。次女嫻，仙生不能言而於世間一切事多不復知。求子不得反失女，天公待我胡不慈。憤來直欲叩閻闔，九關高遠不見答。既厄我名復無後，我生獨在空蕭颯。

醒遺書來，知恂甫母子於十日中相繼逝世，哭之以詩。皇天降酷罰，吾家丁其凶。一枝又已斬，存我知孤桐。譬如黃臺瓜，四摘旋成空。我父二昆弟，伯父生從兄。從兄有三子，方期振家風。長者為端甫，剛謹能博通。作買有材幹，哭父違命終。維仲曰質甫，迂魯殊吳蒙。可憐逢賊刃，一病連秋冬。恂甫



最黠慧。嗜好其身業。搏捕奮一擲。酖毒耽尤工。坐此日貧困。卒未悔厥衷。母氏多溺愛。誨導久無功。一朝書遠至。悲痛填心胸。伯父緒已絕。九泉應怨恫。千鈞繫一髮。繼續惟吾躬。

思歸

憂時誰共話。辛酸久客思。歸涕不乾。鄉里屢驚姻。舊盡江湖。終賴聖恩寬。穗垣無地營。幽築淞水。何年把釣竿。欲往東瀛瞻。北闕此身去。住總為難。

葬身

幼時每喜長。及長又羨小。譬人有所求。難得斯為寶。少者固有壯。老者難更少。消息通陰陽。循環悟大道。我少能文章。致身苦不早。用我既無人。青衫遂潦倒。吹竽恥自媒。彈鋏羞輕造。坐令歲月徂。志豈在溫飽。轉徙浮江湖。飢驅逼華皓。遠遊

歷歐洲。大地如球繞。三年彈指間。雪泥印鴻爪。歸來隱粵江。塵累謝相擾。著述聊自娛。屏跡事幽討。多病念家鄉。久客思淞泖。迴首少壯時。所過跡如掃。大藥難駐顏。春風詎噓稿。衰年阻歸期。憂心怒如擣。一旦恐溢然。葬身此絕島。

哀宗

吾宗二百四十年。今日所存僅一線。樹衰早已刪旁枝。子子惟留此孤榦。危乎不絕真如縷。一髮乃繫千鈞弩。問嘗約略展家譜。讀未終篇淚如雨。譜作乾隆之初禩。相傳四代五男兒。時猶多忌諱。隱約其言詞。殉難勝國社。闔門靡子遺。始祖甫垂髫。逸出為齊贅。譜云擾攘之際守忠殉難始祖必憲公甫在垂髫入贅清河僅存一髮按始祖

自此單傳至我父。必憲生晉侯生三子。仲叔二房俱無後。孫生載。載載。載生敬。敬生即吾祖也。兩家伯仲歌棠棣。伯氏二傳條



已斬。伯父。端甫。批。南。生。竹。筠。生。三。惟。我。孤。存。在。天。際。二。百。卅。年。祇。一。人。我。又。無。子。承。家。祭。嗟。此。衰。宗。世。所。稀。天。欲。絕。之。非。人。爲。自。明。迄。今。已。七。葉。及。我。不。祀。盱。其。悲。問。天。不。語。涕。沾。臆。五。十。無。兒。事。可。知。

吳子登侍讀見過卽送其奉使美洲

偷生海外免斫頭。五十老翁何所求。掩關但解耽文史。息轍併欲疏交遊。彈丸絕島粵門戶。西歐歸來作鄉土。鸞皇雖在枳棘棲。安肯低飛狎凡羽。窮年不見故人來。春風豈復噓蒿萊。有時掉臂獨游市。空聞鴉雀聲如雷。昨者屋輟至自北。高軒忽枉來吳賔。乍喜形容略老蒼。漸驚髣髴髮都斑。白遙遙一別十九年。相逢意外殊茫然。君昔還鄉吾避粵。升沈從此判天淵。爲話飄零憐我在。耳熟鄉音喜無改。著書不滿先生笑。

淪落何須叩真宰。維君持節使美洲。宣揚威德資謨猷。聖朝此事方翔始。立功萬里鞏皇甌。定遠介子今亦有。皇華應選多我友。羨君此行亦足豪。勸君更盡一杯酒。用。

題蘊玉仲司馬墓田耕讀圖

玉仲司馬人中豪。文章卓犖冠其曹。酒龍詩虎素跌宕。醉後往往生牢騷。不作雄飛作雌伏。墓田歸去勤耕讀。讀固其分耕或難。此行我可爲君卜。旣無負郭良田三百畝。又無插架奇書十萬卷。日耕日讀兩不成。虛願難償約豈踐。况君翩翩貴介儔。天家雨露多渥優。簪纓世澤不肯守。反欲學農學圃。把鋤耰卽日親在謀。祿養親亡不仕成高尙。結廬永寄蓼莪懷。墓田咫尺時瞻望。然君今猶羈一官。應官聽鼓哦其冠。常從大吏仰顏色。何能閒與農父談暑寒。繪圖徵詩多稱好。王



郎閱之幾笑倒。徒從紙上作空談。無端藝語逞文藻。以此問君君奚辭。還君圖畫欠君詩。俟君他日果歸隱。再索我詩猶未遲。

贈日本執行子能

子能日本稱詩豪。獨具卓識輕凡曹。撫懷時局思自奮。意氣直欲凌雲霄。讀書泰西夙所向。探奇絕異窺深高。語言侏離辨同異。文字詰曲窮芒毫。壯游萬里豁懷抱。洪流濯足乘波濤。學成歸來爲世用。割鮮小試庖丁刀。旅居香海獲相見。壇場幸接欽丰標。方今世事頗棘手。強鄰西北紛宣驕。我朝武功震宇內。薄海久靖邊塵囂。羈縻豈徒在禮意。毋令倉卒驚回颺。惟君建樹有大志。文章經濟紛揚鏹。爲言家在東京住。江干小築堪漁樵。圖書插架多古帙。劫火不燬奇光燦。我友寺田亦君友。東遊約我頻招邀。二君嗜好同臭味。譬如蘭芷毋相滄。我將去矣與君別。引杯慷慨歌且謠。歌且謠心煩燥安得千里逞騏驎。反思一枝藏鶴鷄。吾聞東國山川富奇麗。蓬壺三島原非遙。但得有田可耕屋可住。避居何必武陵桃。結廬他日共君隱。從容詩酒娛昏朝。

和粵東長將軍五十自壽詩謹步原韻

雨露新從北闕來。神仙居本近蓬萊。家聲遼薊從頭數。詩筆壇場生面開。公著有芝隱室詩鈔麟閣勳名傳世業。龍門德望濟時才。年華五十稱觴始。勸飲循環日百回。持旌嶺嶠渥承恩。勇士環營盡育賁。虎旅卽看開重鎮。龍光從不隔遐藩。將才昔已東陞著。德政今同北斗尊。歌詠昇平齊介壽。廣筵開處對清樽。



喜聽營前鼓笛譁。自天降福定多遐。平生經濟原儒術。大雅  
情懷出將家。秋日巡邊嚴選隊。春風及第豔簪花。門庭勝事  
殊堪羨。毋怪當筵對客誇。  
人生行樂及芳辰。正喜添籌物候新。勝算防秋先有備。羣欣  
函夏久無塵。同時降世稱生佛。一代高名仰偉人。定卜綸扉  
需翊贊。未容松菊遂閒身。

睡起

蕭蕭雨意便成秋。一味新涼枕簟留。睡起不知時早晚。落花  
風急撲簾鉤。

自粵回滬瀆作還鄉行

我生十九離鄉縣。三十年來游歷倦。瞻望里門萬里遙。何時  
得遂歸耕願。幾驅出門至錦溪。相違咫尺已含淒。逮後移家  
去滬瀆。生涯朝夕憐羈栖。一自風塵艱國步。兵戈忽斷故鄉  
路。跳身急作天南行。飄零敢道儒冠誤。失意遂爲汗漫遊。天  
邊踪跡溷西歐。胸中久已吞雲夢。脚底直欲窮瀛洲。此回真  
作還鄉計。屈指離家幾流涕。已及晉文去國年。更嗟蘇武投  
邊歲。飛輪激浪促行程。海濤聲若鳴不平。三日往風兩日霧。  
收帆初見春申城。卸裝到處恣游覽。目中不盡滄桑感。徒看  
亂後盛鶯花。每笑樽前瀝肝膽。江山如夢劫灰餘。骨肉已盡  
親朋疏。誰言久別相知寡。變盡形容尙識余。

至吳門晤楊醒逋明經

與君十八年前別。今日相逢尙黯然。滿眼江山如舊夢。驚心  
骨肉隔重泉。雖嗟形貌都非昔。所幸文章各自編。邇歲研田  
殊不惡。卜鄰應有撰碑錢。



同醒逋往游各園

劫灰燼後留城郭。元氣回初識里門。尚有園亭娛逐客。自饒花木羨幽居。芳菲景物昇平候。士女便娟點綴餘。深幸殘生能覩此。結鄰鄧尉願猶虛。

燕集徐氏未園席間賦呈兩之方伯

廻帆卻喜與君同。同附英國郵船返滬小集名園眼界空。久欲烟霞逃世外。須知邱壑具胸中。平分仕隱娛清福。半近城村見化工。久客初歸無屋住。許容高枕聽松風。

日本品川領事招飲席上賦呈

兩國同文自昔通。今瞻道貌海雲東。已驚名士詩篇富。謂座中深識賢侯學術崇。遠結鄰歡開變局。近師長技表雄風。富強有效輕商管。我欲乘槎問事功。

贈日本竹添漸卿即書其詩集後

古來詩流區萬派。波瀾吐納黃河隘。風雲月露皆正聲。入以性情參沆瀣。我從嶺表識君名。一卷新詞冰雪清。意君歸帆已東指。何幸相見春申城。君年四十走天下。水乘蜻蛉陸跨馬。心雄不知行路難。妙景當前總須寫。月落聞雞早渡關。身經萬里獨往還。棧雲峽雨飽閱歷。雕琢奇句娛心顏。君詩鏗訇震里耳。鐘鏞一出箏琶止。名山絕業良在茲。日東詩史自君始。平生意氣敢後人。今日逢君歎絕倫。我才肯謂出君上。乃獨賞識於風塵。傾襟幸得接談席。為說瀛臺舊仙跡。春光今已遍蜻洲。兩岸櫻花門紅碧。客中饒客華筵開。明日別君登蓬萊。君向北游送我。行。我且東去待君回。

答吳瀚濤少尉即步其韻



平生自作信天翁。慙愧詞壇一世雄。甯願學書兼學劍。未經  
奇禍必奇窮。卅年空下才人淚。四海誰知國士風。恰似高秋  
初鍛羽。徒張健翮迅摩穹。  
伊子懷抱託靈芬。風雨名山感逝文。終見上書流賈誼。未聞  
折檻旌<sup>上</sup>朱雲。揮戈尙欲廻三舍。拔戟猶能樹一軍。落落眼  
中今有子。匡時才畧足超羣。  
不作人間第二流。奔濤萬里駕輕舟。蒼茫誰劃東西界。門戶  
終分上下游。千古文章心自得。五洲形勢掌中收。頭銜何必  
勞人間。一笑功名付馬牛。  
老來百事久心灰。驚見宏文絕點埃。海內一頭應子讓。詩中  
生面獨君開。陳琳河朔誰知己。庾信江南自述哀。如我飄零  
安足問。不禁爲國惜人才。

答廖樞仙教授見贈之作。卽和其韻。

夢中伸足萬丈深。空際劍佩何嚴森。下牀叩頭捧書讀。乃是  
九天之玉音。上書光緒某日月。乘槎渡浦辭黃歇。三神山在  
縹緲間。嶺南仙尉其先謁。吾聞仙尉今詩豪。蓬萊作吏福尤  
高。不教拔宅竝東來。豈欲汗漫同盧敖。吾與仙尉初相識。夙  
服宏文已造極。古籍久笑歐廬陵。逸書早辨孔安國。竭來此  
間九目留。嘯傲意氣凌滄洲。湊川山色布引泉。都從百尺樓  
頭收。落拓天涯嗟不遇。如我飄零安足訴。論交久已薄庸流。  
讀書豈欲干時譽。邈世惟與猿鶴親。放浪江湖稱散人。歎子  
垂白溷俗土。煩君殺青傳逸民。但工文章原末技。端賴雄才  
掃綺靡。學語戲作蠻參軍。君頗解日看花徒惱蘇刺史。春光  
將盡歸江南。天公爲閏三月三。余於三月十六日自粵言施



櫻花雖謝芍藥放。遨頭肯向山中探。

初至江戶集飲東台長醜亭。來會者二十有二人。小野湖山。驚津毅堂。藤野海南。川口江東。龜谷省軒。鹿門三島中洲。小山春山。大鄉學橋。河野荃汀。寺田望南。星野豐城。木下梅里。鱸松塘。村山拙軒。小牧櫻泉。西尾鹿峰。猪野熊梁。野口屏陽。佐田白茅。蒲生綱亭。平山蕉陰。皆東都之魁儒碩彥也。或有位於朝。或致仕家居。並以文章學問。提唱風雅。一時之秀萃於此矣。爰作長歌以紀之。

神州三島浮鴻濛。三千年未東西通。我來粵海乘長風。手招屏翳驅豐隆。神山被引住九日。揚帆遙指江都東。此間人才之淵藪。衣冠東國羣推崇。自與泰西開互市。變法方詔中興功。二三有志守古學。與我文字猶相同。僂僂願執弟子禮。我拔其尤羣爲空。我初至日開盛讌。牛耳高踞詞壇雄。二十二



節遠駕五花驄。兩邦苟聯唇齒誼。遠方何敢張弧弓。止談風月盡此樂。一言藉以明吾衷。詩成寫向雪色壁。碧紗應待他年籠。

蘅華館詩錄卷四終

蘅華館詩錄卷五

長洲 王 韜 仲弢

戲贈墨川茶亭女子。

窈窕佳人慣折腰。已看裝束十分嬌。只教司茗不司酒。遣與王郎伴寂寥。

薄游墨川漫賦四律。卽和茶亭中詩碑原韻。

游蹤羣指墨江頭。一覽同登最上樓。三月櫻堤長新碧。半江桃水湧春流。欲傳世有千秋筆。不繫心如萬里舟。今古虛名原一瞥。閒情我欲問浮鷗。和枕山 大沼厚

堤樹籠煙碧漲漣。滎陽曾此墜輕鞭。鶯花已醒廿年夢。簫鼓空聞十里船。絕海飄零還跌宕。深閨孤負致纏綿。項山妻 有書來清

游今日偕君輩。別後相思各一天。和松塘 鐘元邦

蘅華館詩錄

卷五



天教今日放新晴。勝地由來著上京。東國文章崇正學。南州  
瑤箭愧浮名。三春花月江于盛。一曲笙歌柳底輕。萬事不如  
杯在手。句用又從海外聽鶯聲。和雪江  
關思敬

四月清和天氣新。良朋共此醉江濱。杯槃笑進鵝兒酒。絃管  
初調燕子春。所招二妓特奏墨  
川水頭燕子花曲自昔神山多舊跡。相傳徐福  
墳尚在紀

伊國熊野山于今滄海靜揚塵。筵前錦瑟知儂意。惆悵華年憶遠  
人。和蘆洲  
植村義

前詩意猶未盡。仍和其韻。作長歌一篇。

天風送我東海頭。共登千秋之高樓。振襟自有<sub>一</sub>世想。濯足  
更思萬里流。滕王作賦晉宗事。片帆頃刻浮輕舟。世情變幻  
雲中狗。人事蒼茫水上鷗。東瀛清水何漪漣。愁教快著祖生  
鞭。外人久思逞戈鏑。與國方欲修樓船。與其臨事嘆拮据。何

如未雨先纏綿。東南何遠輸西北。我欲上問彼蒼天。今朝欲  
雨又放晴。天意許我游東京。平生忠孝根惻怛。豈使齷齪留  
其名。功業未建著述在。蜉蝣撼樹徒相輕。中宵起舞發壯志。  
聽此喔喔非惡聲。我來墨川游覽新。佳人窈窕江之濱。繁絃  
渠善譜新曲。健筆我愧開陽春。即今上士尚草莽。豈獨而我  
悲風塵。舉杯慷慨不盡醉。我其於世為放人。

席上贈小鐵校書

鐵中錚錚有小鐵。此鐵乃是肝腸結。洪爐熾炭胡不鎔。要煉  
人間蕩子魄。嫣然一笑天為春。吳兒木石亦關情。琵琶彈出  
銷魂曲。三條絃上多秋聲。天涯我久嗟淪落。羞同白傅青衫  
哭。東游特地泛槎來。失意看花愁萬斛。筵前忽與小鐵逢。迷  
離燭下明粧紅。知我狂吟發清興。玉手為捧青芙蓉。研  
名柳橋



春色今已盡。小鐵容與徐娘並。鐵天地亦壞多情。何況凡軀  
花作命。小鐵聞言意轉悲。珠喉抑塞歌聲遲。轉向當筵催進  
酒。勸我斗酒吟百詩。詩成小鐵恹若失。四座無譁皆漏急。卽  
傾江水作淚波。憂時不滿此胸臆。酒闌燭灺飲不豪。青衫那  
及紅顏嬌。驅車各自東西去。寸鐵殺人空爾驕。

偕江戶諸名士。小集後樂園。卽席賦呈。

名園雅集得追陪。今日同傾河朔杯。四境環山皆樹木。一椽  
近水占樓臺。清風百世臣心苦。史筆千秋生面開。喜見東南  
寶主美。鯁生何幸泛槎來。

席上復得長歌一首。卽和黃公度參贊原韻。

鯁生東游拙語言。叔度霞舉何軒軒。幸陪游屐來此間。惟名  
士乃傳名園。園爲源公之所創。生薄冕綬潛邱樊。野史亭開

勤蒼萃。有異遺山於金源。惟公好事古無匹。時招俊彥開  
樽。公學所造冠諸子。自足拔戟成一軍。舜水先生寄高躅。瞻  
念家國懷君恩。我來訪古心慷慨。誰歟後起扶斯文。平泉綠  
野此髣髴。逕留苔蘚侵堦闌。秦西通市法一變。坐令西學羣  
推尊。乾綱獨秉太阿利。豈復跋扈如桓溫。園中題字出遺老。  
摩挲猶有前朝痕。陰森古木坐濃綠。時未向晚日已昏。飲罷  
驅車偕子去。霸才誰是江東孫。

秋月種樹議官席上呈川田雍江編修。卽和其見贈原韻。

飛渡東來萬里船。相逢偏在墨江邊。文章早已崇今代。明治

集多收君作日木向多王姓云是子笙鶴曾聞駐古仙。晉後商後賜姓山田氏垂老風塵

慙著述。好遊山水入詩篇。神交何限滄波遠。好把君名萬口

蘅華館詩錄 卷五 三 張園叢書



傳。

酒半戲呈秋月

盲翁負鼓唱斜陽。惱亂蘇州俠士腸。那有千秋在胸臆。演來花月儘荒唐。管領鶯花十萬人。卻教盲史演遺聞。座中豈有樊川在。怕發狂言乞紫雲。

增田岳陽席上有作。并呈魯生副使。即和原韻。

東去欣瞻海外輶。幾番治具辱相邀。廿年酒國虛清學。百戰詩壇奪錦標。余不見魯生副使已廿年作史雄才誰可敵。憂時壯志莫輕消。一家文字都爛令。不獨羹湯手善調。岳陽撰清史學

要一家姬妾識字工詩

偶訪栗本勉菴。口占七七占一篇贈之。

先生可比賈長頭。頭童齒豁與古游。說經談道眾無匹。風雲筆底千言遒。東京文社君所創。賞罰褒斂嚴春秋。浮海東來見君面。奇緣天賜能小留。為投縞紵結金石。慷慨意氣尤相投。年來我亦持清議。睠言家國懷殷憂。論事往往搜眾怒。世人欲殺狂奴囚。掉首東游未寂寞。此興不孤同登樓。

小集柳橋川長樓。賦呈座中諸同人。

莫怪王郎太有情。相逢只是說流鶯。樂天老去樊川謫。尚得天涯薄倖名。東國名儒談道學。南州狂士說鶯花。不知至理原無異。兒女癡情總不磨。

鋤雲以余尚未得妙人為憾事。口占二十八字答之。

老去名花已癩看。况逢四月滯輕寒。異鄉最要調眠食。喜服



良宵獨睡丸。

席上贈中村正直

修文館裏曾相見。知是騷壇擅盛名。自愧東游真草草。未攜行卷謁先生。

淞北逸民歌

淞水之北有逸民。但願長醉弗願醒。用一朝酒盡意不樂。天荆地棘逃南服。逸民醉來哭當歌。平生所遇鬱勃多。逸民醒後歌當哭。熱血填胸灑向孰。

沈梅史州守招飲楠亭分韻賦詩余拈得賦字

林鳩朝呼泥滑路。蠅灘又是風光暮。一雨三日天不晴。楠亭濃綠昏於霧。休文招我吟詩來。敢翫登高能作賦。躡治洪爐非卽金。持鼓雷門猶是布。誰爲汪汪千頃波。文壇飛將黃叔

度。邇來東國多才人。擊鉢催詩成七步。秋月石川尤其豪。時門清新出佳句。沈侯健者梁侯靜。餘子紛紛何足數。王郎掉臂作東遊。潦倒青衫嗟不遇。胸中熱血吹不涼。肝膽還向酒邊露。東來日日看花醉。身入花叢屢廻顧。欲效司勳乞紫雲。不信樂天放樊素。小曼風流小園俠。皆當筵坐擁尤物羨且妒。隙隅昔已笑參軍。鴛鴦今又隕都護。平生奇氣鬱勃多。休怪當筵來傾吐。弗待千歲桃花開。且教兩月蓬山住。

石川鴻齋席上贈詩卽步其韻奉酬

特地乘槎我欲東。片帆天賜與長風。杜陵老去才無用。庾信平生賦最工。豈有鸞凰櫻世網。尙遲夔曠出絲桐。蠻爭觸門須臾事。不滿王郎一笑中。

過海聞名癡若雷。相逢亭畔且傾杯。文章自有千秋在。風會



何期萬古開。潦倒向深憂。世志艱難須仗出。羣才當筵今日。舒懷抱。如我何辭尚草萊。

芳原新詠 并序

東京為日本新都。壯麗甲他處。而芳原尤為繁華淵藪。每當重樓向夕。燈火星繁。笙歌雷沸。二分璧月。十里珠簾。遨遊其間者。車如流水。馬若游龍。麟麟之聲。徹且不絕。真可謂銷金之窟也。烟花之盛。風月之美。以及色藝之精巧。衣服之麗都。柳橋新橋。皆不逮也。旅居無俚。偶從密友。買醉紅樓。看花曲里。覽異鄉之風景。瞻勝地之娟妍。覺海上三神山。即在此間。爰即是日所見。為七絕十二章。聊付小紅藉浮大白。敢作柳枝之新唱。或可補花月之舊聞云爾。

殿春花放我東來。入夢繁華眼倦開。不數揚州花月盛。本來此處是蓬萊。

到底風流是上京。十分裝束動人情。我來惜已春光暮。綠樹陰中聽晚鶯。

大道朱樓十里連。美人像竝列楣邊。燃犀何用煩温嶠。請自從頭辨醜妍。芳原一帶皆妓居。紅樓夾道。廣廈崢嶸。以西法。

第一樓中第一人。春花作貌王精神。紫雲幾效樊川乞。慙愧東來眼界新。角海樓名妓。曰小紫。素肌雪奪。玉貌花妍。媚眼流波。秀眉丹鳳。洵不愧為此中翹楚。

歌舞筵開選藝場。不教雲雨夢襄王。宓妃曾贈陳思枕。故在人前太曲防。日本青樓中人。分色妓。二等。色妓。但薦寢房。而中能為房中之樂也。

阿玉雖鬢最擅名。腰肢輕亞藝尤精。弓身貼地銜盃起。羊侃



家中尚數卿。藝妓玉姬。綺年玉貌。於工歌舞之外。能反身至

阿鑠。小千代。小留。雖以藝稱。而仍以此勝。皆平康里之。橋稱者。

唇脂狼藉復塗金。加粉蓋飾。此與嶺南。滬比。髮髯相似。惟胭脂

之外。復以金點唇。則不同。雲鬢花枝不上簪。最是舞裙斜露處。雙趺如雪

似觀音。多赤足不鞋。六寸。層圓。雪光。綴。六寸。

當筵音調聽伊啞。推手琵琶來抑手。琵琶。樂器。看來渾不似。不煩

玉指撥紅牙。歌妓多攜三絃。其有三絃者。不恒見也。悉以牙片撥絃。成聲。不煩十指。

幫閒亦慣習箏絃。男子之習曲。藝者曰幫閒。五十樓中領袖偏。新舊嬌娃

都識遍。烟花隊裏小神仙。舞盤舞傘疾如飛。熟勝宜僚技亦稀。富本牛平。善於股技。以雙足承物。盤旋。勝於宜僚之。最喜雄聲出唯口。流鶯百轉聽來非。玉姬能轉喉作弄丸。向來東北限鴻溝。此日飛軒任爾游。十萬名花齊待汝。人生

何再覓封侯。昔坊原東比地。設門為限。止遊客可入。今已闕。屋中合遊客見。而悅意者即留宿焉。

如此繁華洵足誇。教工歌舞屬誰家。黃金安得高於屋。買盡

東京十萬花。

招沈梅史。陳訪仲。王漆園琴仙昆仲。小集長門酒樓。酒

半各賦一詩。半皆詼諧調笑之作。梅史以隱語作七古

一篇。因亦和韻答之。麴窮大鳥聊工游戲而已。不足言

詩也。

綏山桃花開滿峰。飛來雨露中天濃。忽逢西池王母笑。桃花

變作青芙蓉。芙蓉綽約秋風裏。高臥秋江呼不起。甘於水畔

吐芬芳。羞在花叢門紅紫。瘦腰專戀沈休文。濃消艷福輕桃

李蓬萊已到尚思家。采藥不歸有王子。



四月望日。藤田鳴鶴。招諸同人。小集於新橋濱。乃家。樹木深蔚。泉石蒼古。居然一名勝所。亭中扁額。題菊詩。尚是西鄉隆盛筆跡。余前日既覽鹿兒島戰功圖。今日又同鹿門諸君子。歷覽招魂社。聞諸君說殉難義士遺事。曷禁慨然有感。爰於席上作長歌紀之。殊有鐵如意擊碎唾壺之概。

日東節義漢代匹。抱義懷忠多激烈。平生知國不知家。身可亡兮家可滅。西鄉本是人中豪。提戈欲靖邊塵囂。請纓有志急一試。赫然金石銘功高。功高賞薄尋常耳。何不角巾歸閭里。坐令一死鴻毛輕。照代宏勳等流水。吾在中土已歎吁。竭來東國觀戰圖。兩軍生死併一命。戰場血肉紅模糊。嗚呼此戰分順逆。順者終興逆者絕。當時義士爭捐軀。不重黃金殞

白鎬。今經此地尚悲涼。鬱然樹木何深蒼。戰鐵可銷骨不朽。化爲碧血千年藏。驅車徑過到濱氏。酒亭當墟女。子馬阿濱。迎門已見香。鮮止美人窈窕多容光。歌聲欲遏流雲駛。小亭池石頗清幽。嫣然花木臨清流。主人昂首指扁額。西鄉筆跡今猶留。題菊詩工句清挺。武功文學一時址。歎有此才弗善用。不爲鸞皇爲鷹隼。聽歌我尚有餘悲。主人勸我且吟詩。詩成一曲歌未終。美人烈士我心同。

席上贈櫻洲山人

家聲宦跡著東京。經濟文章夙擅名。紅粉兩行勞久待。君最

至後看余援筆賦花卿。

席上贈花山

得閒便是小神仙。况結紅樓花月緣。絃管聲中推領袖。莫來



東國李龜年。

清華吟社小集。兼贈米花主人。

米花主人靜者流。風雅好事誰其儔。三椽小築當崇岡。環岡樹木鬱青蒼。月舉文社與斯文。扶輪大雅殊超羣。裙屐至後壺觴開。翩翩羣彥登瀛臺。我來幸與盛會逢。天涯結契苔岑同。豈真入社要攢眉。深恐擊鉢難成詩。諸君才調皆不凡。偶然下筆見一斑。我文未敢占人先。聊將餘墨吟詩篇。

阿傳曲 有序

阿傳日本農家女子也。生於上野州和根郡下坂村。貌美而性蕩。笄年偷嫁。所歡浪之助。非父母命也。後浪之助得惡疾。阿傳恥之。共趣去浴於草津溫泉。以此泉能治癩也。鄉人聞而憐之。來勸之歸。阿傳不從。

適緇商某旅途宿此。見阿傳事。夫甚謹。異之。其妾聞時。就阿傳語。始知爲同族姊妹。行因勸夫邀阿傳。共往橫濱。延美國良醫平文治之。座有橫濱船匠員弁吉藏者。願任其事。延阿傳夫婦於家。而又有魚賈清五郎者。俠客也。憐阿傳夫婦。時濟其窮。顧浪之助。病卒不瘳。仍就浴於溫泉。途中遇盜失金。哭訴於逆旅主人。緇商某適寓其家。時方讌客。婢以事聞。緇商憫其貧。探囊贈以資斧。及來謝。乃知卽阿傳。遂與繼綵。旋阿傳從緇商於家。商妻畀以金絕之。未幾浪之助死。或傳其死爲吉藏所毒。然事終不明。夫死一周。阿傳歸省。父縷訴。往事艱辛狀。阿傳父母慮女前行。令妹貽書規之。阿傳置弗省。邂逅市太郎。卽作文君之



奔其他穢行不悉數。最後寓東京淺草天王橋畔旅舍。曰九竹亭。室宇精潔。花木蕭疏。吉藏素識阿傳。因呼侑觴。并留宿。而不給以金。阿傳憾焉。乘其醉寐。手刃之。託爲報姊仇。被逮至法廷。猶爭辨不屈。幾成疑案。經三年而後決。今年正月。中事也。時演於新富劇場。以寓勸懲。余特作阿傳曲紀其事。

野鴛鴦死紅血迸。花月容顏虺蜴性。短緣究竟是孽緣。同命今翻爲併命。陰房鬼火照獨眠。霜鋒三尺試寒泉。令嚴終見爰書麗。閭里至今說阿傳。阿傳本自農家女。絕代容華心自許。爭描眉黛門遙山。梨花閉戶春無主。并年偷嫁到汝南。羨殺檀奴風月譜。花魂入牖良宵短。日影侵簾香夢酣。歡樂無端生哭泣。溫柔鄉裏風流劫。一病纏綿不下牀。避人非是甘

岑寂。溫泉試浴冀回春。旅途姊妹情相親。一帆又指橫濱道。願奉黃金助玉人。世少盧扁真妙手。到底空牀難獨守。狐綏鶴合只尋常。蝶誓鸚盟無不有。伯勞飛燕不成羣。仇儷原知中道分。手調鴛湯作靈藥。姑傳疑案付傳聞。一載孤栖歸省父。骨肉情深盡傾吐。阿妹貽書伴弗省。真成跋扈胭脂虎。市太郎經邂逅初。目成已見載同車。貌艷芙蓉嬌卓女。才輸芍藥渴相如。自此倚門彈別調。每博千金買一笑。東京自古號繁華。五陵裘馬多年少。旅館淒涼遇舊歡。欲搖銀燭夜初殘。詎知恩極反生怨。帳底瞥擲刀光寒。含冤地下不能雪。假手雲鬟憑寸鐵。世間孽報豈無因。我觀此事三擊節。阿傳始末何足論。用寓勸懲。閨門我爲吟成阿傳曲。付與鞦韆部紅牙翻。



燕谷中將第并序

陸軍谷中將。今代偉人也。熊本之役。力守危城。功尤卓卓。在人耳目間。好客禮賢。其素性然也。今月下旬。新築初成。嘉賓咸集。韜以遠人。幸得躬逢其際。席間謹作七律一章奉呈。

夙仰英名擅八垓。救時須仗出羣才。孤城自昔安危繫。小築於今嘯傲來。裙屐遍招詞客至。樽罍特爲遠人開。羨君門將兼儒將。百戰功成醉幾回。

紀谷中將守熊本城事。卽步詩僧五岳韻并序

西鄉之變。谷君時爲少將。守熊本。賊軍以二萬圍之。經兩閱月。猶不去。君嬰城固守。誓與存亡。中間激勵將士。時出奇兵。以殲賊。而孤城卒完。大局以定。保障

之功。聲施爛然。夫西鄉以嗜嘯宿將。蓄謀舉事。所部多亡命。健兒好勇善鬥。當者幾莫敢撓其鋒。况其時叛者四起。人心離渙。賊勢披猖。畿輔近地。無險可守。而熊本適當其衝。此城陷則天下事未可知也。故君之守熊本。猶唐張巡之守睢陽。特君終能滅賊耳。然則君之功。豈不偉哉。

孤城將崩。壓壞雲。健兒兩萬。犄角分。官軍善守。賊善攻。特縱烈燄如山焚。熊本城扼天下險。此城一破。賊乃無長安。飛丸洞城。城不摧。兩軍攻守。嚴輪般。賊勢日驕。兵勢感。城雖未拔。力已單。惟君忠義貫日月。直以一身當其難。矢窮糧絕。氣益奮。撫勵壯士。臣心殫。一戰再戰。出奇策。鼓聲如怒。忘嚴寒。維時援兵。雖至亦隔絕。內外勝敗。如不聞。六十日圍。神鬼愁。所



恃非在池濠深。屹然一城抵百城。西南保障殲流氛。嗚呼君  
功一國安危之所繫。令人想見飛將軍。

席上贈角松校書

角松校書。艷絕人寰。衆美畢具。風流秀曼。殆無其儔。  
固新橋巨擘也。余始見之於濱。乃家臨水亭子上。卽  
不能忘。余青衫老矣。落拓天涯。苦無知己。今之愛角  
松者。譬諸天生一種名花。不得不愛護珍惜之也。此  
意甚公。見者幸勿以私心測度也。

姊妹花開竝擅名。風流才調果傾城。秋波無限銷魂處。媚眼  
天生百種情。

雪作肌膚玉作容。艷名早已噪京東。新橋春色惟卿擅。萬綠  
叢中一點紅。句用

小集深川清平樓和石井南橋韻

休作吳兒木石腸。平生竿木慣逢場。詩壇近尙新宮譚。酒國  
今刪舊約章。絃韻偏隨流水咽。眉痕合鬥遠山長。一觴一咏  
尋常事。醉倒筵前亦不妨。

暫撇思鄉一寸腸。且教小住鬱金堂。神仙潦倒來蓬島。雲雨  
荒唐說楚王。自有詩成三百首。何辭酒罄十千觴。玉郎跋扈  
飛揚態。莫笑今宵八醉鄉。

復疊前韻

綺筵不覺蕩迴腸。筆陣從君鬥百場。莫厭珠孃成十索。須知  
漢法有三章。暫來蓬島綠猶淺。生作桃花命亦長。靈藥初成  
仙釀熟。問津今夕亦何妨。

老我溫柔百折腸。樽開此夕敞華堂。舞來窈窕當筵妓。醉倒



瑯琊大道王。眉可通詞還倩筆。花能解語必傾觴。羈人只有  
神山樂。不解清涼憶故鄉。

贈小菊

婀娜風情窈窕姿。玉環態度燕腰肢。菊花門艷秋風裏。正是  
王郎歸去時。

贈小令

綽約風流迥出塵。玳簪斜插鬢雲新。樊川已老秋孀少。要結  
今生未了因。

藤田鳴鶴重招燕於濱乃亭。見壁間詩僧五岳詠西鄉  
詩。慨然有感。卽步其韻。

謀國誰能下一籌。平生事業愧千秋。淮陰空作無雙士。溫嶠  
還居第二流。不盡樽前今古感。安知身後姓名留。蓬萊已到

神仙杳。逕欲乘槎訪十洲。

招角松校書不至。再疊前韻。

笑共飛觴數酒籌。晚涼亭畔似初秋。神光忽被巫雲阻。豔影  
曾隨璧月流。前度會借角松小立池畔團扇悲涼新詠在。仙裙縹緲別家  
留。莫來不是蓬山遠。慙愧王郎到此洲。

席間贈藤田鳴鶴吉田二酉。三疊前韻。

才畧輸君共幾籌。胸中自具魯春秋。已驚筆下千言湧。早聽  
名從萬口流。日下文章重錦爛。雲間鸞鳳健毛留。試觀二妙  
齊驅日。藉甚聲華遍五洲。

晚飛車遊根津口。占二十八字。

繁星萬點夜燈開。有客驅車訪艷來。三百名花誰第一。宵深  
扶醉下樓臺。



借鹿門同謁神田聖廟兼觀書籍館。

夙昔同文本一家。類宮制度似中華。極知洙泗宗風遠。不獨蓬萊勝地誇。百首逸書逃世外。千年秘籍出瀛涯。娉媵何幸身親到。眼福於今十倍加。

小集不忍池上嬌語亭。鹿門詩先成。卽和其韻。

風傳嬌語隔湖聞。玉貌當墟迴出羣。醇酒婦人還好茗。莫來猶勝信陵君。

濕翠浮波香遠聞。鷺鷥深處自成羣。瑤英本是容平視。莫笑疎狂蘇使君。

鹿門所招歌妓未來。戲呈一律。

一泓碧水漾漣漪。消夏亭中此最宜。未見紅裙捧觴立。却教玉手捲簾遲。跳魚撥刺時聞響。涼鷺迷離正浴池。醉倒玉郎

歸去晚。填風荷露夜深時。

卽席間戲語。偶成一詩。以示同人。

燕領虎頭飛食肉。英雄貌自殊流俗。瓶城本相天下士。特張吾軍氣亦足。鹿門乃偏出別解。謂予消受惟艷福。一月之中易兩姬。要使餐花比饌玉。兩行紅粉盡嬌然。知余好色流媚目。三女成祭我所歡。惜若蟠桃猶未熟。座中三歌姬綺年三玉貌嬰伊可憐千年作蓬萊遊。得遇仙姝緣不薄。藥姬去後玉姬來。伴我一月中宿。靈丹九轉已入喉。石髓初凝還果腹。人生此卽萬戶侯。何須再要千鍾粟。世間富貴只尋常。天上神仙有嗜欲。一瞥功名安足論。百種溫存莫自促。千秋萬歲等銷磨。古人已作一邱貉。莫從身後博浮名。且向筵前聽短曲。

重游墨川小集八百松亭。



墨川之水清且漣。墨川之姝嬌且妍。四人連鑣重至此。風光  
勝絕欲暮天。輕雷乍過微雨歇。娟娟新綠淨於沐。八百松樓  
突兀間。最上登臨極遠目。吾友寺田靜者流。圖書耽好無所  
求。精辨宋元講簿錄。人間奇帙恣羅搜。林君書城擁十萬。赤  
文綠字發光怪。娜嬛福地君占先。我特乘槎來海外。吾宗漆  
園居浙東。東游採藥探靈蹤。懷才不屑居人後。奇句往往驚  
蛟龍。娉婷小勝吾豔友。別來溟濕青衫袖。今日重逢在此筵。  
欲傾墨川水作酒。美人名士此筵中。吾心感慨君心同。隔隣  
牛飲走旋磨。琵琶但聽聲丁冬。

寶劍篇贈增田岳陽

前書寶劍齋。因索寶劍篇。自言此劍製自名人手。流傳至今  
九百年。寒芒高射斗牛外。夜夜齋中發光怪。昇平此物非用

時。徒自炫鬻殊足戒。脫匣出視利無傳。其氣肅殺天爲秋。平  
生恩怨不快意。借我請斬仇人頭。

龜清樓小集和龜谷省軒韻

母多酌我蓋寬饒。功業休論漢相蕭。不作出山霖雨計。只來  
蓬島覓藍橋。

龜清樓外望長橋。遠友歸來酒興饒。自恨看花今較晚。可憐  
兩鬢已蕭蕭。

只問新橋與柳橋。向來花月此偏饒。卅年早覺繁華夢。絕代  
珠孃舊姓蕭。

十里煙波浸緯蕭。二分明月照紅橋。深閨昨寄懷人淚。玉臂  
清輝遠思饒。

記得揚州廿四橋。垂楊垂柳影蕭蕭。神州尙是銷金窟。自有



腰纏十萬饒。

龜谷省軒迎母西京回。暗於龜清樓席上賦呈。和沈梅

史州守韻。

遠道慈親夢。天涯遊子蹤。歸家一月別。憶友萬山重。對酒鄉  
心雜。看花客興濃。版輿經驛路。應繞最高峰。從西京至江都  
道經富士山下

席間作短歌示同人。

長橋臥虹。明月當空。有酒不飲。豈曰英雄。今夕何夕。良友重  
逢。白華潔養。慰此寸衷。謂省軒 壺觴既洽。文字其同。一堂之上。

賓主南東。人才蔚起。詩學攸崇。我來蓬島。揚扆宗風。

源侯桂閣招飲席上和石川鴻齋韻得二絕句。

甘在花叢過一生。狂來無計破愁城。青衫痛哭無乾日。要向  
源侯借酒兵。

捫蝨雄談誤此生。制情好似築堅城。花天本是波瀾幻。恃有  
胸中十萬兵。

源侯席上和名倉松窓韻。即呈主人。

不知誰主復誰賓。醇酒佳人見性真。樓外一江飛墨水。樓中  
人半是傳人。

南樓新築燕嘉賓。花月今宵分外真。可有庾蘭成在座。風流  
到底屬斯人。

名倉松窓十七年前見之香海。今重遇於墨川樓上。復  
得一絕句。

相對沾巾是此辰。相逢疑否又疑真。廿年事業渾如夢。明是  
當時佩劍人。

朔州樓小集。席上贈何陋居士。

黃華館詩錄

卷五

六

漫園叢書



好酒好花兼好色。能書能畫又能詩。鄭虔三絕由來擅。跋扈

飛揚想少時。磊落英多一奇士。中年惟與酒盃宜。才人失意佳人老。一樣

飄零日暮時。

和山本居敬先生遙寄之作

牛耳詞壇踞上游。文章夙已擅風流。江湖作客悲王粲。風雨

聯床憶子由。予不歸吳興已二十八年矣。弟末路飄零還自奮。

天恩高厚未能酬。勞君詩札遙相寄。幸到蓬山最上頭。

小集東台嬌語亭贈馬場毅

知君盲目不盲心。洗盡胸中俗慮侵。下筆烟雲多麗藻。吟詩

山水有清音。甯同張籍干時切。想比唐衢憤世深。亦欲向隅

同一哭。世間夔曠豈能尋。

偕成齋先生至清華館同人未來出示灑堂文集

衆人皆未來。而我至獨早。林亭頗幽僻。涼颼爽懷抱。周遭樹

蕪鬱。濃綠淨如掃。炎威午不驕。白雲滂天表。軒窓既四敞。靜

坐息膠擾。解衣聊盤礴。於此恣幽討。出示豹人文。渾如獲瓌

寶。此集傳者稀。兵燹後益少。灑堂長於詩。才幹極雄灑。旅食

京華春。青衫幾潦倒。若非魏科開。將以一巾老。晚歲奮功名。

何必嗟華皓。其文亦可傳。頗不尙詞藻。睹鳳在一毛。藏之其

永保。

題鶴鳴集贈鶴鳴老人

鶴鳴老人古所稀。逍遙詩酒怡天機。年垂八十尚矍鑠。登山

健步猶如飛。平生具有山水癖。所居泉石多清奇。峰巒四環

蒼翠。中構草堂肩雙扉。讀書不出甘忘世。五陵富貴嗤輕



肥。矯然合子世無匹。崢嶸頭角衣紆緋。立朝風節秉庭訓。版  
輿迎養娛親闈。我聞丹邱本仙境。靈淑所鍾非凡姿。翁昔操  
守夙自負抗懷言事屢陳詞。吾謀弗用坐遷謫。荒村屏跡空  
歔歔。讀君之詩知君遇。耽幽樂道能知幾。美君有子并有詩  
豈徒壽與千秋則。

題補春天傳奇

春濤先生。今代詩人也。令子槐南。承其家學。又復長  
於填詞。最工度曲。年僅十七齡。而吐藻采於毫端。驚  
泉流於腕底。詞壇飛將。復見斯人。今夏同人小集不  
忍池邊長酩亭上。先生出示其令子所作補春天傳  
奇。情詞旖旎。丰致纏綿。雅韻初流。愁心欲絕。不禁有  
感於懷。爰題六絕句於上。以志鴻爪。

千古傷心是小青。折將情字比娉婷。西泠松柏知誰墓。風雨  
黃昏獨自經。

秋墳鬼唱總魂銷。誰與芳魂伴寂寥。絕代佳人爲情死。一般  
無酒向春澆。

一去春光不復還。補天容易補情難。嬋娟在世同遭妒。寂寞  
梨花泣玉顏。

好事風流有碧城。同修芳塚慰卿卿。知音隔世猶同感。地下  
人間聞哭聲。

譜出新詞獨擅場。居然才調勝周郎。平生願曲應君讓。付與  
紅牙唱夕陽。

刻翠裁紅渺隔生。怕聽花外轉春鶯。當年我亦情癡者。迸入  
哀絃似不平。



贈瑞松山人并序

西京瑞松山人。工於鐵筆。遐邇咸聞其名。本家鴨江之畔。去年乃移家江都。數椽小築。新構落成。門臨江水。夏時荷花正開。清香遠徹。入其廬舍。布置幽雅。殊不知在百丈軟紅塵裏也。其為風雅好事可知矣。己卯夏間。予旅東京。瑞松山人特介白澤晴皇。招予小飲其家。親觀其奏刀。頃刻間成二器。花石禽鳥。無不酷肖。工細罕倫。此古今絕技也。宜其擅名東京。獨出冠時矣。即席走筆作五古一章贈之。并為誌其顛末如此。

聞君善刻畫。使刀如使筆。初不用藁本。腕底具神力。頃刻一鳥成。飛鳴振羽翼。須臾一樹成。扶疎長枝葉。但聞刀畫聲。兎鶻起落捷。維君擅絕技。生平所僅識。是亦猶文章。妙手乃能得。一藝足傳名。令我三歎息。

藤野海南招飲於上野公園八百善亭。和沈梅史韻。

崇岡起亭榭。古木環深蒼。登臨豁遠目。六月生微涼。主人頗好事雅集。傾壺饒綺羅。惟素好翰墨。參古香。我將游晃山。與子期何方。海南時有溫泉之行。小集此亭。與同一言別。余亦擬將日光山。故未句及之。

紀鴻臺戰跡并序

余游日光山。取道於河路。經下總國南岸。成齋遙指岑蔚處。樹木鬱然。曰此鴻臺城墟也。天文年間。里見義宏與北條氏康政父子戰處。是役也。義宏敗績。自是北條氏兵威益雄於關東。距今三百四五十年。邱陵尚在遺跡。猶存。予因感而弔焉。



萬夫攻關一夫守。天險所存原非偶。一城扼要鴻臺高。巍然形勢雄關右。里見據此殊足豪。敵軍雖來亦何有。北條當日稱梟雄。麾下健兒好身手。彼豎子耳何足謀。竟爾一戰棄城走。數載經營付逝波。君爲楚舞我楚歌。大事一去不可挽。此後誰人揮天戈。雄威自是震宇內。關中霸業日益多。昔人往矣遺跡在。我經其下空婆娑。廢墟尙照今日月。荒臺猶是古山河。

用源賴政埋骨處并序

賴政官從三位。治承年間奉以仁王舉兵。討平相國清盛。不克。戰於宇治。兵敗自刎。其地距西京三十里。許其臣渡邊唱奉其首來葬於此。古河侯爲建專祠。崇血食。賴政事雖不成。而檄其同族賴朝。並舉義旗。

終得克馘平氏。平源興廢實基於此。首倡之功亦偉矣哉。

昔者大政歸將軍。幕府幾竝天王尊。平氏專權源氏憤。奉天討罪報國恩。一戰再戰臣力竭。堯道之水空嗚咽。孤壘殘兵扼此間。我頭可斷節不失。顧謂其臣瘞我頭。我身雖死名千秋。義旗旣舉必有繼。要檄天下與之讐。維時相國懲事後。下令要購孤忠首。詎知積敗生驕盈。赫奕威嚴能幾久。從來論事貴首功。不以成敗輕英雄。國賊之討君獨倡。朝廷卹典攸推崇。詔書建祠多焜耀。俎豆春秋許憑弔。距今遙遙七百年。行人尙指田間廟。我來懷古意慷慨。爲冒驕陽履灌莽。蛛絲罨戶蟬聲哀。無限荒涼空想像。男兒不朽在微名。一死寵辱何由驚。何人見自九京回。寂寞身後鳴不平。



車過金井驛口占二絕句

村驛車行步不如。驕陽曬遍腹中書。炎塵十丈臨官道。却羨  
家居午睡初。

卅里松陰趁晚涼。蟬聲嗚咽送斜陽。村姬自把雙眉畫。似與  
遙山鬥艷粧。

謁東照宮

丞相祠堂此最崇。千秋猶復仰雄風。深嗟土木窮民力。但見  
雕鏤奪化工。自古僭侈傳世促。只今冷落霸圖空。天家恩澤  
猶稱渥。不廢春秋祀典同。

游日光山將歸作詩別山靈

吾來山中已三日。初無一詩答山靈。山靈昨夕懲我頑。宿荷  
忽發身弗甯。惟我登山興弗阻。蟻屐更向險處經。出奇欲與

山靈戰。飛符天上遣六丁。萬里乘槎作遠客。况工文字胸羅  
星。何不食我胡麻飯。何不飲我桃花醴。乃徒狡獪使我病。山  
氣入骨寒冥冥。書生受侮叩真宰。綠章萬字陳金庭。天公一  
笑兩無袒。俾呈奇境娛視聽。飛巖橫懸匹練白。排闥遠送嵐  
光青。泉流萬道走虹霓。石吼一隙驚雷霆。更令驕陽時蔽匿。  
涼意散作微雨零。復有無數黃蝴蝶。沿途護我藍輿停。行竹  
木中衣袂碧。遙參鼻觀山花馨。半旬游歷差快意。乃與山靈  
相忘形。重游未下在。何日特祝山靈千萬齡。

日本刀歌贈佐川裡所即留別

佐生矯矯日本豪。叩門求見意氣高。手持休文書一紙。以沈

馬介一書解條贈我日本刀。光世出匣如匹練。當是精鏤經百鍊。

握刀起舞生寒飈。動若流星靜掣電。寶刀乃以贈書生。佐生



視此刀何輕。我生已無我馬想。豈求殺賊成公卿。寶刀自此  
不復用。壁間夜夜聲驚象。忽持此刀斫陣歸。雄心未死來入  
夢。中庭間步起徘徊。負此寶刀心獨哀。雖有恩讐何敢報。時  
平久已混嫌猜。我少惜未習劍術。起弄此刀如九疾。殺人只  
在寸鐵間。慎守霜鋒莫輕出。閨中久唱大刀環。一笑王郎竟  
渡關。得此刀如得健僕。隨予萬水并千山。舟中再拜謝君賜。  
前言戲耳勿介意。得志當爲天下雄。長揖請視刀誰利。

栗本鋤雲錢予柳島酒樓席上作詩賦別。

相逢未久遽相離。遠道驪歌恰客思。嶺表秋風驚去夢。江南  
暮雨悵新知。怕聽折柳陽關曲。休唱飛花驛路詞。尚有綺懷  
忘不得。玉釵銀燭酒闌時。

相思此後隔遙天。無限離情到酒邊。百日勾留千載遇。一編

遊歷衆人傳。

時予方作扶桑游記故云

詩篇敢謂追摩詰。詞句應還愧仲

仙。莫聽蕭娘彈一曲。愁心都付與秋絃。

成齋編修集諸同人大張祖席於中村樓。酒酣作歌留

別。

我之來兮春光非。我之去兮秋風起。秋風起兮遊子歸。萬重  
山兮千重水。離情渺渺愁淒淒。相思不識何時已。臨行把酒  
勸重遊。予其祝我倘無死。子酌我兮金叵羅。我贈子兮玉版  
紙。上寫今日離別詞。中有淚痕流不止。滄洲縹緲神仙居。百  
日因緣亦足喜。忽然欲去不可留。夢魂一夜歸鄉里。豈無窈  
窕解語花。綽約風前艷桃李。泥我飲兮我不辭。含情顧影明  
燈裏。况復文字足相娛。座中往往有佳士。成齋卓犖天下才。  
誠卿斌媚今無比。鹿門龜谷多雄豪。時排筆陣摩吾壘。兩國



相通三千年。文士來遊自我始。敢云提唱開宗風。結社清華爭倒屣。某年日月我去來。大書特書補青史。

小燕龜清樓。留別諸同人。口占二絕句。

酒杯偏與晚涼宜。今夕銀燈照去思。小女不知離別恨。出箋猶是乞新詩。

簫鼓喧闐共一船。新秋時候暮涼天。美人名士團樂坐。彈到離愁第幾絃。

歸經神戶。小燕漢川酒閣。留別吳瀚濤少尉。

廻帆重復指神山。前度歡悰今別顏。轉益離愁辭閩島。怕聽哀調唱陽關。流泉嗚咽飛懸練。陣雨溟濛失遠鬟。草閣一觴同話舊。長虹天際忽彎環。

平生豪氣俯凡流。今日逢君讓一籌。舉世豈真無北海。論交

當自有南州。從茲一別七千里。此後重逢五大洲。天下事今猶可挽。出山霖雨爲民謀。

晚來一雨嫩涼生。爽氣成秋入酒觥。垂死雄心王景畧。一生低首謝宣城。卽看痛哭狂歌地。彌見憂時憤世情。久薄微官等匏繫。黃山歸去好躬耕。

慷慨論心意氣豪。忘年直欲締深交。眼中齷齪空餘子。世上模稜笑汝曹。使酒談兵與俗忤。哀絲脆竹要才銷。黃河泰岱他時事。今日先見立品高。



蘅華館詩錄卷五終

跋

鯨波鼉浪。漂泊年年。雁帛魚書。浮沉歲歲。問故人其焉往。慨游子之忘歸。從前詩酒。幾成隔世之緣。別後情懷。多作再生之想。謂君已矣。闔室因而聚泣。獨我存乎。鄙人得不含酸。乃者雜錦字以遙投。藉珠編之遠賁。驚喜欲狂。急盥薇而展誦。然疑交作。爰熱燭以披吟。范叔固無恙乎。子卿非長辭矣。嗟乎粵王臺下。碧水連天。趙尉城邊。紅棉匝地。陟歌舞之頽岡。興亡生感。過昌華之廢苑。寥落堪悲。加以帆檣所指。海多艱。趨之風。僕馬垂頭。山有瘴蒸之雨。路隔七千。那來坦蕩。難非十八。盡足恐惶。羈愁鬱結。爭發洩於五言七字之中。旅况艱辛。盡頽唐於短幅長篇之內。固宜其途次所歷。每有感觸。輒形於詩者也。况復淞濱爲少長之鄉。滬上實翱翔之所。歡邀蘅華館詩錄

跋

幾園叢書



杜牧。煖尋藏柳之鶯。閒訪林逋。冷看守梅之鶴。或搜秘於林泉。發揮妙理。或借題於風月。抒寫性靈。吳娃盪槳。爲製新聲。越女調絃。屢翻舊曲。上客從而擊節。名流許其探驪。斯時也。誠有芒情四溢。逸氣橫流。所謂但覺高歌有神鬼。誰知餓死填溝壑者矣。若乃旅邸朝眠。客樓夜上。月有情而入檻。風無賴以吹衣。一罇獨酌。感劍佩之飄零。千里辭家。怨刀環之阻滯。於是動陸機之鄉思。起莊舄之吳吟。天寒袖薄。倚修竹以無言。晝靜簾垂。對狂花而欲泣。游蹤歷歷。譜入歌謠。愁緒紛紛。寫將筆墨。嗟乎江上鷓鴣。空叫斷遊人之夢。檐前杜宇。難喚回蕩子之心。白頭永隔。重來訪我于泉臺。青眼爲穿。此去慰君于海澨。爲詳顛末。用作題詞。卽爲死別之書。不勝生前之感。半林居士跋。

48-13173

明治十四年一月廿四日出版御届  
同 年二月出版

訓点人

愛知縣平民

石川 鳩 齋

芝區片門前町三丁目十四番地

東京府平民

山中 市 兵衛

芝區三島町十番地

同

山中 孝 之 助

京橋區銀座三丁目九番地

同

山中 喜 太 郎

同 四丁目十四番地

出板人





